

SAMUELI TAKADA PLADE

Dauda kíblena Yudanɔa 1:1-4:12

Dauda kíblena Isaraila buri s̄inda pínkinaɔ 5:1-12:31

Abusalomu bona Dauda kpε 13:1-20:26

Dauda kíblena kpεkpε 21:1-24:25

Dauda Solu ga baarumanaa

¹ Solu gana gbera Dauda sù kù z̄iblena Amalekinɔaao, akù à ḡò Zikilaga ḡoro pla. ² A ḡoro aak̄ode z̄i ḡògbē ke bò Solu bùran à sù. A pókasanɔ kēkēna, bùsu ká a min. Kù à kà Dauda k̄inaa, à kùtenε à w̄ute a gberεa. ³ Dauda a là à pì: N bo máa? À wèa à pì: Ma bo Isarailanɔ bùrammε. ⁴ Akù Dauda a là dɔ: À kè dera gwee? Ñ omεnε. Akù à wèa à pì: Isarailanɔ bò z̄ilan ò bàa lè. Ñ daside lète ò gàga. Solu kù a né Yonatāo gà dɔ. ⁵ Akù Dauda kefenna kù àten baaruu pì kpáare là à pì: N ke deran ní d̄s kù Solu kù a né Yonatāo gàa? ⁶ À wèa à pì: À sù à lè má kú Giliboa kpi gerεei gwemε, akù ma Solu è, àten gbāna e a sária. S̄ogodenɔ kù s̄denɔ ten ká k̄aao k̄ini. ⁷ Kù à litε ma kpa, à ma e, akù à ma sisi. Ma pì: Makù dí! ⁸ Akù à ma la, makūmε dí ũu? Akù ma wea ma pì Amaleki burin ma ũ. ⁹ Akù à p̄imεnε mà naai mà a dε, zaakù á kú ga léimε, bee kù a wé kpé kēna f̄iti. ¹⁰ Akù ma nai ma a dè, zaakù má d̄s aní f̄s à ble a letεnaa gbera doro. Akù ma a kífura kù à kunaa sè kù z̄ā kù à danaao, akù ma suonne la ma dikiri. ¹¹ Akù Dauda a pókasanɔ gà à kè, akù gbē kù ò kú k̄aonɔ ní pónɔ kēkē se. ¹² Ò Solu

kū a né Yonatão gana ɔ̀ɔ̀ d̀ò kū Dikiri gbẽ Isarailano, zaakū zì n̄ blé. Wé'i b̀òmma, akū ò lé ỳi ari ɔ̀kɔ̀si.

¹³ Dauda keƒenna kū à baaruu p̄i kpàare là à p̄i: N be kú máa? Akū à p̄ine: Bòasu nén ma ũ, Amaleki buri. ¹⁴ Akū Dauda a là à p̄i: À kè dera kína kū Dikiri kà dena v̄ina dí n kũroo? ¹⁵ Akū Dauda a keƒenna ke sisi à p̄i: N a lé n̄ de se. Akū à a lè à dè. ¹⁶ Zaakū Dauda ḡinake à p̄ine: N n z̄ida dème. N z̄ida lé mé à n da yã, n p̄i n kína kū Dikiri kàa dè.

Wëndale kū Dauda s̄i Solu kū Yonatão ga yã musu

¹⁷ Dauda w̄enda lè díkina s̄i Solu kū a né Yonatão ga yã musu. ¹⁸ À p̄i ò lèe p̄i dada Yudanone. À kú Yasa takadan.

¹⁹ Isarailano gakurideno g̀aga s̄is̄ger̄ei, ḡɔ̀sa gb̄anano i òme fá!

²⁰ Àsun a baaru kpá Gata zédanlo, de Filisitini n̄gb̄eno sún a p̄onna kero yã.

Àsun a kpàkpa ke Asakeloni, de gyɔ̀fɔ̀r̄de n̄n̄gb̄eno sún ayuwii kero.

²¹ Plí sún kpá Giliboa gbèea doro, legū sún ma bura kū ò kú gwenon doro,

gwen ò ɔ̀ s̄ò ḡɔ̀sa gb̄anano s̄ēgbakon̄i, nísi d̄ɔ̀k̄na Solu s̄ēgbakoa lé zè!

²² Kū òten ḡɔ̀sa gb̄ana aru fã gua, òteni n̄ gbere para,

kàzuri p̄āsī Yonatã d̄i kpe gwaro, f̄ēd̄ade p̄āsī Solu d̄i su koriro.

²³ Solu kū Yonatão, gbẽ mana yenyidenome!

Odi k̄k̄ɔ̀a w̄endi ke ganaa gūnlo.

N̄ w̄ana de v̄aun̄la,

ń gbãna de músunla.

²⁴ Isaraila nɔgbɛnɔ,
à wé'i bo Solu ga yã musu.

À biza tɛra yĩáre kũ nɔmanablebɔnɔ,
à á pókasanɔ kèkéáre kũ zãblebɔ kũ ò pì kũ wu-
raaonɔ.

²⁵ Gõsa gbãnanɔ i ò zìlan fá!

Yonatá wutɛna gè ũ s̄s̄igɛɛɛi.

²⁶ Ma gbɛ Yonatá,
ma gõ warikɛnaa gũn n yãì,
ń manamɛɛ swáswa.
Yenyĩ kũ ń vĩ kũmao sára vĩro,
à de nɔ yenyĩla.

²⁷ Gõsa gbãnanɔ i ò fá!

Ñ zìkabɔnɔ kàkatɛ.

2

Dauda kana Yudanɔ kpatan

¹ Abire gɛra Dauda Dikiri gbèka à pì: Mà gé Yuda wɛtɛ ke gũn yá? Dikiri pìnɛ à gé, akũ Dauda èra à a là à pì: Mákpan mà génn? Dikiri wèa à pì: Eblɔnu kpa. ² Akũ Dauda gèɛ gwe kũ a nɔ mèn planɔ, Yɛzɛrili gbɛ Ainɔama kũ Nabala gyaanɔ Abigaili, Kaameli gbɛo. ³ Dauda gèɛ kũ gbɛ kũ ò kú kãaonɔ dɔ, baadi kũ a bedenɔ, akũ ò vùtɛ Eblɔnu kũ a lakutunɔ. ⁴ Akũ Yudanɔ gbɛ zɔkɔnɔ sù ò nísi kù Dauda m̄ia gwe, ò a kà Yudanɔ kína ũ.

Kũ Dauda mà Yabesi Giliadadenɔ mé ò Solu v̄ì, ⁵ à gbɛnɔ zìmma, ò gèɛ ò ònne: Dauda pì, Dikiri arubarika daágu, kũ a gbɛkɛ kè Solu á dikiriine a a v̄ì. ⁶ Dikiri gbɛkɛ yã kũ náani yão keáre. Makũ s̄s̄o mani yã mana keáre kũ a yã pìi kè yãì. ⁷ Tera sà àgõ

gbãna à kù gbãna ke. Á dikiri Solu gà, akū Yudanɔ ma ka n kina ũ.

⁸ À sù à lè Nere né Abana, Solu zìkarinɔ gbē zōkōɔ gĩnake à gèe se kù Solu né Isiboseo Manaimu. ⁹ Akū à a kà kina ũ Giliada busun kù Asa burinɔ būsuo kù Yezerialio kù Eflaimu burinɔ būsuo kù Biliaminu burinɔ būsuo kù Isarailanɔ būsuo kparanɔ pínki.

¹⁰ Solu né Isibose wè buplade gūnn à gò Isarailanɔ kina ũ. À kí blè wè pla. Yudanɔ sō, Daudan ò zèo.

¹¹ Dauda kí blè Yudanɔa zaa Eblonu ari wè suppla kù mɔ suddoo.

Isarailanɔ zìkana kù Yudanɔ

¹² Nere né Abana kù Solu né Isibose zìkarinɔ bò Manaimu ò gèe Gibiō. ¹³ Zeruya né Yoabu kù Dauda zìkarinɔ fùte ò gèe danle Gibiō íkaki sare. N gà do kù í bara la, n gà do kù í bara dire. ¹⁴ Akū Abana pì Yoabune: N tó kefenna kenɔ futekōi ò gwa. Akū Yoabu pì: Ò gé.

¹⁵ Akū Biliaminu zìkarinɔ fùte gbēnɔn kuri awεεpla Isibose pó ũ, akū Dauda zìkarinɔ fùte gbēnɔn kuri awεεpla se.

¹⁶ Baadi ɔ kà a ɔsikari dake kòkɔɔɔi, akū ò kō zōzō kō gbàntereεa kù fēneo ò lète leεle. Akū ò tó kpà Gibiō gu pìne Fēnelennabura. ¹⁷ Zì kù ò kà zì birea pāsī manamana, akū Dauda zìkarinɔ zì blè Abana kù Isarailanɔa.

¹⁸ Zeruya négōgbē gbēnɔn aakōnɔn kù gwe, Yoabu kù Abisaio kù Asahelio. Asaheli sō a bà nna lán zō bà. ¹⁹ Akū à pète Abanai, adi lite ɔplai ke ɔzeiro. ²⁰ Kù Abana a kpe gwà à a è, akū à pì: Asaheli, mɔkōmme gwe yá? À wèa à pì: Makūme.

²¹ Akū Abana pìne: N lite n ɔplai ke n ɔzei, n

kefennano doke kũ ò a póno sía. Ama Asaheli dí zenero. ²² Abana era à pine do: Ñsun namairo. Ní ye mà n den yá? Tó ma n de, mani we ó wé ke siikõ kũ n v̄ni Yoabuo do yá? ²³ Ama Asaheli gi, adi zenero, akũ Abana a z̄õ a gberẽa kũ a sári páo ari à bò a kpe kpa. Gwen à lèten à gà ḡõno. Kũ gbẽ s̄inda pínki kà gu kũ à lète à gà pìn, ò zè òten gwa.

²⁴ Akũ Yoabu kũ Abisaio pè Abanaa ari ifántẽ ḡe à ḡè kpén. Ò kà Ama s̄is̄i kũ à kú Gia ifáboki kpa Gibiõ gbáranna zén. ²⁵ Biliaminu burino kàkara Abanai gà do, akũ ò ḡe òten gí kũ ní z̄idao s̄is̄i musu. ²⁶ Akũ Abana lé zù Yoabui à pì: Óni ze k̄õdeɗenaaneroo? Ní d̄õ kũ yã pì ni mì de kũ p̄õsiraoroo? Ñni o n gb̄ẽno ò zewere ò era ò tároo? ²⁷ Akũ Yoabu wèa à pì: Luda kun! Tó ñdi lé sí yãro, ma gb̄ẽno ni zeárero ari gu gé do. ²⁸ Kũ Yoabu kuru pè, akũ a gb̄ẽno kámma bò, odi gé Isarailanoa kũ z̄iio doro.

²⁹ Gwãani birea Abana kũ a gb̄ẽno tãa ò s̄en ò bikù Yodaa, akũ ò té swad̄ooci ari ò ḡe ò kà Manaimu. ³⁰ Kũ Yoabu sù kũ p̄ena Abanaaao, akũ à a z̄ikarinõ kàkara ní pínki. Dauda gb̄ẽno té gb̄ẽnon baro donsari mé ò kunlo, Asaheli baasi. ³¹ Ò Biliaminu kũ ò kú kũ Abanaono d̄ede gb̄ẽnon wàa do kũ bas̄oarakõ. ³² Ò Asaheli ḡe sè ò v̄ a de miran Betilihamu. Akũ Yoabu kũ a gb̄ẽno tãa ò gwãani ò kà Eblonu gud̄naao.

3

¹ Z̄i kũ Solu bedeno kà kũ Dauda bedeno gi kè. Dauda gbãna ten kara, Solu bedeno s̄õ, ní gbãna ten

lago.

Dauda négṣgbēnṣ

² Négṣgbē kū Dauda ì Èblnuno tón dí. A káaku tón Aminṣ. A da tón Ainṣama, Yezerili gbēme. ³ A plade tón Kiliabu. A da tón Abigaili, Nabala gyaanṣ Kaameli gbēme. A aakṓde tón Abusalomu. A da tón Maaka, Gesuru kína Talamai nème. ⁴ A siikṓde tón Adonia. A da tón Agi. A sṓrode tón Sefatia. A da tón Abitali. ⁵ A suddode tón Itiriamu. A da tón Egela. Dauda nṓnṓ né pìnṓ ì Èblnume.

Abana nana Daudaa

⁶ Gṓrṓ kū Solu bedenṓ ten zì ká kū Dauda bedenṓ, Abana ten gbāna kū Solu bedenṓ gūn. ⁷ Solu nṓ yìgisaride vī yā, a tón Rizipa, Aya nème. Isibose pì Abananε: À kè dera n wute kū ma de nṓo? ⁸ Abana pṓ fè manamana Isibose yā pì yāi à pì: Gbēdan ma ũ Yudanṓ kpa yá? Maten gbēke ke n de Solu bedenṓne kū a dakūnanṓ kū a gbēnnanṓ ari kū a gbārao. Mádi n na Daudanε a ṓĩro, akū nteni ma taari e nṓgbē pì yā musu sàa? ⁹ Tó mádi lé kū Dikiri sè Daudanε kenεro, Luda yā kemεne pásĩpásĩ. ¹⁰ Mani kpata sí Solu bedenṓa mà tó Dauda gṓ Isarailanṓ kū Yudanṓ kína ũ sena zaa Dani ari à gé péo Beṣebaa. ¹¹ Isibose dí we à wè Abanaa doro, kū àten vīna kenε yāi.

¹² Abana gbēnṓ zì Daudaa kū a tóo à pìnε: Dí mé à bùsu vīi? Ò lédokṓnṓ ke, mani kpányĩ de Isarailanṓ bàka le àgṓ kú kūnwo n pínki. ¹³ Akū Dauda pì: À mana, mani lédokṓnṓ ke kūnwo, ama yā mèn don maten gbekamma. Tó nten su ma gwa, tó nídi sumεne kū Solu nénṓgbē Mikalaoro, òsun tó ó wé

sikɔlɛro. ¹⁴ Dauda légbāzā kè Solu né Isibosene à pì: Ì ma nanɔ Mikala sukpamene. Ma anzure blè kŭ Filisitininɔ gyɔfɔrɔ mèn basɔro. ¹⁵ Akŭ Isibose gbēnɔ zì, ò nɔgbē pì sɪ a zā Palatieli, Laisi néa. ¹⁶ Akŭ a zā pì ten gé kãao à téi ari Bahurimu, àten ɔɔ dɔ. Akŭ Abana òne à era à tá, akŭ à èra.

¹⁷ Abana yā ò kŭ Isaraila gbē zɔkɔnɔ à pì: Zaa zī àten wete Dauda gɔ de á kina ũ. ¹⁸ À a ká sà, zaakŭ Dikiri lé sene à pì, áni a gbē Isarailanɔ bo Filisitininɔ kŭ n̄ iberenɔ ɔ̄ n̄ pínki a zòbleri Dauda pìi gāime. ¹⁹ Abana yā pìi dà Biliaminu burinɔne n̄ sãn dɔ. Akŭ à gèe Eblonu, de à yā kŭ à kè Biliaminu burinɔne kŭ Isarailanɔoo pì o Daudane. ²⁰ Kŭ à kà Dauda kīnaa zaa Eblonu kŭ gbēnɔn baro kŭ ò kú kãaonɔ, akŭ Dauda pɔnna pòble kèr̄ne. ²¹ Akŭ Abana pì Daudane: Ma dikiri kina, ò tó mà fute mà gé mà Isarailanɔ kakaranne n̄ pínki, de ò lédokɔnɔ ke kŭnwo, ìnigɔ de bùsu kŭ n pɔ yei pínki kina ũ. Akŭ Dauda Abana gbàre, à tá aafia.

Abana denaa

²² Zī birea Yoabu kŭ Dauda gbēnɔ sù kŭ létemmaanao. Ò pónɔ sɪ gbēnɔa manamana ò sùo. Abana kú kŭ Daudao gwe doro, zaakŭ à a gbàre, à tá aafia. ²³ Kŭ Yoabu kŭ zìkari kŭ ò kú kãaonɔ kà, ò òne Nere né Abana sù kina gwa, akŭ à a gbàre à tá aafia. ²⁴ Akŭ Yoabu gèe à kina lè à pì: Bó yān n kè gwee? Kŭ Abana sù n kinaa, bóyāi n tò à tàa? ²⁵ Ì Nere né Abana dɔroo? À sù ɔ̄ndɔ kenne, de à le àgɔ n gégɔrɔ kŭ n sugɔrɔ dɔ kŭ n yākenanɔ pínki. ²⁶ Kŭ Yoabu bò Dauda kīnaa, akŭ à gbēnɔ zì, ò pète Abanai. Ò a lè Sira lògɔ kīnaa, akŭ òten su

kāao, ama Dauda a yā dōro. ²⁷ Kū ò kà kū Abanao Eblonu wēte bīnilea, akū Yoabu a sīsi lándō à ye à asiriyá onε bà, akū à a z̄̀ a gberεa à a dè. A dakūna Asaheli dεna fīnaan à bòa gwe.

²⁸ Abire gbera kū Dauda mà, à pì: Makū kū ma kíkεo, manigō taari vī Dikirinε Nerε né Abana dεna yā musuro. ²⁹ Yā pì ni wí Yoabu musumε kū a de bedenō n̄ pínki. Yoabu bedenō nigō kun kentude ke kusu ke εε ke gbē kū z̄̀ a blè ke nàderii sariro. ³⁰ Yoabu kū Abisaio Abana dè, kū àkū mé à n̄ dakūna Asaheli dè z̄̀lan zaa Gibiō yāi. ³¹ Akū Dauda pì Yoabunε kū gbē kū ò kú kaaonō n̄ pínki: À á pókasanō gága à kēkē, à uta kasanō daála, àgō té arε kū Abana gèεo kū ́́d̄́o. Kína Dauda s̄̀ à té n̄ kpε. ³² Akū ò a vī Eblonu gwe. Kína wēnda ́́ d̄́ò gbānagbāna Abana miraa, akū gbē sīnda pínki ́́ d̄́ò se. ³³ Akū kína wēndale díkīna s̄̀ Abana yā musu à pì:

Abana gana lán mìsaride bà manan gwe yá?

³⁴ Òdi n gā yīnne n kpε kparo,

òdi m̀̀kakōana kánnero,

n ga lán gbē kū à gè yāvānikerinō ́́i bà.

Akū gbē sīnda pínki èra ò ́́ d̄́ò d̄́o. ³⁵ Gbē sīnda pínki sù ò ò Daudanε à pó ble ari gu gō gé si, ama à la dà à pì: Tó ma burodi ke póble ke dà ma lén ifāntē gēna kpén sari, Luda yā kemene pásīpāsī. ³⁶ Gbē sīnda pínki wé tè yā p̄̀ii, akū à kḗ́nε mana. Yā kū kína ten ke pínki di ke gbēnōne maname. ³⁷ Z̄̀i birea Dauda gbēnō kū Isarailanō pínki d̄́ò sà kū kína lé kú Nerε né Abana dεna yānlo. ³⁸ Akū à pì a gbē p̄̀inōne: Á d̄́o kū Isaraila don'arede z̄̀k̄́o gā gbāraro? ³⁹ Makū s̄̀,

bee kũ Luda ma ka kína ũ, ma busa gbāra. Zeruya né pìno yākena pāsĩ de ma póla. Dikiri mé ani fĩna bo vānikeriine a vāni lén.

4

Isibose denaa

¹ Kũ Solu né Isibose mà Abana gà Eblonu, a kã gà, akũ Isarailano gè bídi gũn ń pínki. ² Solu né pìi zìkari gbě zōkōno vī gbēnon pla, a do tón Baana, a do sō Rekabu. Bero gbě Rimō, Biliaminu buri nēno me. Ò Bero dīte Biliaminu būsū pó ũ yāme, ³ zaakũ Berodeno bàa lè ò tà Gitaimu ò kú gwe ari kũ a gbārao. ⁴ Solu né Yonatā sō à né vī ere ũ. Goro kũ né pìi kà wè soro, akũ Solu kũ Yonatāo gana Yezērii baaru sù. Kũ a gwàri a sè àten bàa lé kãao, a wānaa gūnn né pìi pìtia à lēte. Abire mé à tò à ere kũ. A tón Mefibose.

⁵ Bero gbě Rimō né pìno Rekabu kũ Baanao fùte, ifāntē gbānai ò kà Isibose bea, goro kũ àten i fānantē o. ⁶ Akũ Rekabu kũ a dakūna Baanao gè kpén ò kè lándō òten gé poblewe dā bà. ⁷ Kũ ò gè kpén, Isibose wutena a gádoa, akũ ò gèi kpéne gũn ò a zō ò dè. Akũ ò a m̀i zō ò sè ò tào. Ò pète Yoda sèn, akũ ò t́aa ò ari gu gèe à d̀o. ⁸ Ò sù Dauda kīnaa Eblonu kũ Isibose m̀io ò pìne: Ñ gwa, n ibere Solu kũ à wète à n de né Isibose m̀in dí. Ó dikiri kína, Dikiri fĩnaa bōnne Solu kũ a burinōa gbāra. ⁹ Dauda wèmma à pì: Dikiri kun! À ma bo ma warikēnaa gũn pínki. ¹⁰ Kũ gbēke sù ma kīnaa Zikilaga yā à pì Solu gà, àten da baaru nnan àten kpá, akũ ma a kũ ma dè. A baaru àreen gwe. ¹¹ Dí deñla lákũ ákōno gbě vāninō a taarisaride

dè a gádoa a kpén nà. Mani a dena fīna boáwa mà á wèndi bo se. ¹² Akū Dauda yā ò a gbēnɔnɛ, akū ò n̄ dɛdɛ. Ò n̄ ɔla kū n̄ gbálanɔ z̄z̄z̄, akū ò n̄ gènɔ lòko Eblonu ítoki sarɛ. Akū ò Isibosɛ mì sè ò v̄ Abana miran zaa Eblonu.

5

Dauda kana Isarailanɔ kpatan

¹ Isarailanɔ sù n̄ buria n̄ pínki Dauda kīnaa zaa Eblonu ò pì: Ó aru dokɔnɔmɛ. ² Zaa zī gɔrɔ kū Solu de ó kína ũ, mɔkɔmmɛ ndì dowɛɛ arɛ zīlan, gena kū sunaao. Akū Dikiri pìnne, mɔkɔmmɛ ñigɔ de a gbē Isarailanɔ don'arɛde ũ, n̄ kína ũ. ³ Kū Isaraila gbē z̄kɔnɔ sù kína Dauda kīnaa zaa Eblonu n̄ pínki, gwen à lédokɔnɔ kèn kúnwo Dikiri arɛ, akū ò n̄isi kù a m̄ia ò a kà Isarailanɔ kpatan. ⁴ Dauda wè baraakuri v̄ gɔrɔ kū à nà kíblenaaa, à vùte kín wè bupla. ⁵ À de Yudanɔ kína ũ zaa Eblonu wè suppla kū mɔ suddoo, akū à de Yudanɔ kū Isarailanɔ pínki kína ũ zaa Yurusalemu wè baraakuri awɛɛ'aakɔ.

⁶ Kína kū a gbēnɔ gèɛ Yurusalemu de à zì ká kū Yebusi kū ò kú gwɛnɔ. Akū ò ò Daudanɛ: Ìni gē laro, bee v̄nanɔ kū ɛɛnɔ oni pémma. Òtɛn da Dauda ni le à gē gwero. ⁷ Bee kū abireo Dauda wète b̄nide kū òdi pi dɔ Zaiɔ p̄i s̄i, akū à ḡɔ a wéra ũ. ⁸ Zī birea Dauda pì: Tó gbē ye à Yebusinɔ dɛdɛ, séde à gē íze kū ò ȳ gbèn gūn, ani ɛɛnɔ kū v̄naa p̄inɔ le. Dauda ibɛɛnɔmɛ. Abire yāi òdi pi, v̄nanɔ kū ɛɛnɔ oni gē kínabearo. ⁹ Akū Dauda bɛ kū wète b̄nide p̄i gūn, à a zīda tó kpàne, Dauda Wète. À kpénɔ bòbo à likai ari

gu kũ ò wèèè tàtan, òdi pi Milo. ¹⁰ Dauda gbāna ten kara, zaakũ Dikiri Luda Zìkaride kú kāao.

¹¹ Taya kína Hiram gbēnɔ zì Daudaa kũ sida línɔ kũ lí'arinɔ kũ gbè'arinɔ, akũ ò be bònɛ. ¹² Akũ Dauda dǝ sà kũ Dikiri a ka Isarailanɔ kína ũmɛ, akũsǝ à a kpataa kàraáɛ kũ Isarailanɔn de Dikiri gbēnɔ ũ yāi.

¹³ Dauda bona Eblɔnu gbera à èra à nɔ pāndenɔ sè à kàra Yurusalemu dɔ kũ nɔ yìgisaridenɔ, akũ à négǝgbēnɔ kũ nénɔgbēnɔ ì kũnwo. ¹⁴ Néǝgbē kũ à n í Yurusalemu pìnɔ tón dí: Samua, Sobabu, Natā, Sulemanu, ¹⁵ Iba, Elisua, Nefɛgi, Yafia, ¹⁶ Elisama, Eliada kũ Elifɛletio.

¹⁷ Kũ Filisitininɔ mà ò Dauda kà Isarailanɔ kína ũ, akũ ò gèè òteni a wete ò a de n pínki. Kũ à n baaru mà, akũ à gèè sèntɛpɔɔtu. ¹⁸ Filisitininɔ zì'ɔ pòro Refaimu guvuten, ¹⁹ akũ Dauda gbèka Dikiri à pì: Mà gé mà léte Filisitininɔa, ñni n namene ma oĩ yá? Akũ Dikiri wèa à pì: Ñ gé, mani n nanne n oĩ. ²⁰ Akũ Dauda gèè Baali Perazimu, à zì blémma gwe. Akũ à pì: Dikiri dòmene arɛ, à bò à sù ma ìberenɔa bùi lákũ í dì gu fǝ nà. Akũ à tó kpà gu pìine Baali Perazimu. ²¹ Filisitininɔ n tãnanɔ tò gwe, akũ Dauda kũ a gbēnɔ sète ò tào.

²² Filisitininɔ èra ò sù dɔ, ò zì'ɔ pòro Refaimu guvuten. ²³ Akũ Dauda èra à gbèka Dikiri dɔ. Akũ Dikiri wèa à pì: Ñsun gényĩ súsuro. Ñ likanyĩ kpe kpa ñ létemma kpè líkpe sare. ²⁴ Tó a gèse kīni mà lí pìnɔ musu, à ke likalika, zaakũ makũme ma bo ma doáɛ arɛ gwe, de mà zì bleáɛ Filisitini zìkarinɔa yāi. ²⁵ Dauda kè lákũ Dikiri òne nà, akũ à zì blè Filisitininɔa sena zaa Gibiǝ ari à gèè pé Gezaa.

6

Suna kũ Dikiri àkpatii Yurusalemu

¹ Dauda ɛ̀ra à Isaraila kũ à ń sɛ̀tenɔ kàkara gbɛ̀nɔn dúbu baraakuri. ² Akũ à fùte à dà kũńwo zén, ò gɛ̀e Baala kũ à kú Yudanɔ b̀sun, de ò Luda àkpati sé ò suo. Dikiri Z̀ikaride digɔ vutena kín àkpatii pì malaika d̀ember�denɔ dagura, abire yáin òdi pì a tó kúa. ³ Ò àkpatii p̀ii dà z̀ugo dufu gũn Abinadabu be s̀isĩ musu, akũ ò dào zén. Abinadabu nénɔ Uza kũ Ahioo mé òten do z̀ugo p̀ii, ⁴ Luda àkpati kún. Ahio mé à té are, ⁵ akũ Dauda kũ Isarailanɔ ten ũ wã ń pínki Dikiri are ń gbãna zaka lén kũ lèsinaao. Òten m̀ɔɔ lé kũ gidigboo kũ s̀eg̀es̀eg̀eo kũ fakao kũ s̀eg̀eg̀eo.

⁶ Kũ ò kà Nakɔ ésegb̀ekia, z̀unɔ g̀e s̀i, akũ Uza ɔ̀ bò à nà Luda àkpatia. ⁷ Akũ Dikiri p̀o f̀eì, à a lè a dè àkpatii sare gwe dà kũ à kè yáì. ⁸ Dauda ǹesee yàka, kũ Dikiri p̀o f̀e Uzai yáì, akũ òdi gu p̀i s̀isi Pof̀'uzai ari kũ a gbãrao. ⁹ Z̀i birea v̀ina Dauda kũ Dikiri yã musu à p̀i: Deran mani ke nà mà Dikiri àkpati sé mà táoo? ¹⁰ Akũ adi we à táo a ẁete gũn doroo, à lite à tàò Gata gb̀e Ɔbedi Edomu bea.

¹¹ Dikiri àkpati kú a bea ari m̀o aakɔ, akũ Dikiri arubarikaa dàn kũ a bedenɔ ń pínki. ¹² Ò p̀i kína Daudanɛ: Dikiri arubarikaa dà Ɔbedi Edomu bedenɔgu kũ p̀o kũ à v̀inɔ pínki a àkpati yáì. Akũ Dauda g̀e gwe, à Luda àkpatii s̀e àten suo a ẁete gũn kũ p̀onnoo. ¹³ Kũ gb̀e kũ ò Dikiri àkpati senanɔ gbá s̀e g̀en suddo, akũ Dauda sa ò kũ z̀usaaoo kũ z̀une b̀ɔɔ m̀ekpanaoo. ¹⁴ Dauda sa'o'uta dana, àten ũ wã Dikiri are a gbãna zaka lén. ¹⁵ Àpii kũ Isarailanɔ

pínki òten su kũ Dikiri àkpatii, òten ponna wiki lé òten kuru pé. ¹⁶ Kũ Dikiri àkpati ten gẽ Dauda wẽte gũn, akũ Solu né Mikala ten zĩte gwa wondoo gũn. Kũ à è kína Dauda ten vĩvĩ àten ũ wā Dikiri are, à a gya bò a swẽẽ gũn. ¹⁷ Kũ ò sù kũ Dikiri àkpatii, ò dìte a gbèn bizakuta kũ Dauda dònne gũn. Akũ à sa'opɔ kũ òdi ká tén à té kũ ò Dikiri are kũ kennakūkɔo sa'opɔo. ¹⁸ Kũ à sa ò à làka, à sa mana ò gbẽnɔne kũ Dikiri Zìkaride tóo. ¹⁹ Akũ à burodii kpàatete Isaraila kũ ò kakarana gwenɔne kònɔ dodo gõgbẽnɔ kũ nɔgbẽnɔ n pínki kũ domina kàraao mèn dodo kũ geepi kàraao mèn dodo.

²⁰ Kũ Dauda ten su be de à sa mana o a bedenɔne, akũ Solu né Mikala bò à gẽe à dàale à pi: Mɔkɔn Isarailanɔ kína, gbẽ bèereɔde yān n kè gwe gbāra yá? N n zĩda mèe mò n ìba nɔgbẽ zìkerinɔne, lán wé'isaride dì a zĩda mèe mɔńne nà. ²¹ Akũ Dauda pì Mikalanɛ: Dikirin ma ũ wānɛ. Dikiri mé à ma se n de kũ a bedenɔ gẽne ũ, à ma ke a gbẽ Isarailanɔ don'areɔde ũ. ²² Mani futa kũ de abirela, mani ma zĩda kĩa n enaa gũn, ama nɔgbẽ zìkeri kũ n térémma pìnɔ mé oni ma bèere dõ. ²³ Akũ Solu né Mikala dí né iro ari à gẽe à gào.

7

Luda lésena Daudane

¹ Kũ kína vùte a bea, Dikiri a bò ibere kũ ò likainɔ ɔĩ à a gbà ãampaki, ² akũ kína pì annabi Natāne: É'e! Kpé kũ ò dõ kũ sida líon manigɔ vuten, Luda àkpati gõ ditena bizakutan yá? ³ Natā wèa à pi: Lákũ à kènne nà n ke, zaakũ Dikiri kú kũnwɔ. ⁴ Gwāani birea Dikiri yā sù Natāa à pi: ⁵ N' gè n o ma zòbleri

Daudane kū ma pì, àkū mé ani kpé kū manigõ kun bomeneero. ⁶ Zaa gɔɔ kũ ma Isarailano bõte Misila ari gbãra mádi be kũro. Madigõ sõsõsõsõme, bizakutame ma kúki ũ. ⁷ Gu kũ ma sõsõn kũ ma gbẽ Isarailano ñ pínki madì don'aredeno dite ò doñne are, ama mádi o ñ gbẽkene, bõyãì adi kpé bomene kũ sida líoro. ⁸ Ñ gé ñ o ma zõbleri Daudane, ma Dikiri Zìkaride ma pì, ma a sè sãdãkia de àgõ de ma gbẽ Isarailano don'arede ũ. ⁹ Má kú kãao gu kũ à gèen pínki, akũ ma a ibereño dèdene. Mani a tó bo manamana sà, anigõ kú andunia tódeno té. ¹⁰ Mani bũsu kpá ma gbẽ Isarailano, mani ñ kátèn, oni vuten ñ pó ũ. Ñ laakari ni fute doro. Gbẽ vãnino ni le ò wé tãñma lákũ ò wé tãñma káaku ¹¹ gɔɔ kũ ma don'aredeno diteñne nà doro. Mani a bo a ibere pino ò ñ pínki.

Makũ Dikiri maten one, makũ mé mani be kene a burino gbãnaleki ũ. ¹² Tó a gɔɔ pàpa à gà, mani a buri kũ à bò a mèn ke sé lei, mani a ká kpatan. ¹³ Àpi mé ani kpé bo kũ ma tó nigõ kúa, mani a kpatablena gbá péte, anigõ kí ble ari gɔɔ sinda pínki. ¹⁴ Manigõ den De ũ, anigõ de ma né ũ. Tó à taari kè, mani wé tãa kũ gòome, lákũ bisãsiri di gbẽ gbẽ nà. ¹⁵ Ama ma gbẽke ni kèkõa kãao lákũ ma kèkõa kũ Solu kũ ma a bò Dauda are nàro. ¹⁶ A burino nigõ kpata ble gɔɔ sinda pínki. A kpata pì nigõ lakana vïro.

¹⁷ Akũ Natã yã pìi gbà Daudane lákũ Dikiri òare nà pínki.

Dauda wékena Dikiria

18 Akū kína Dauda gè à vùte Dikiri are à pì: Dikiri Luda, bón ma ũu? Dínɔn ma bedenɔ ũ kū n ma ka gwena dí takaaa? 19 Dikiri Luda, abirekū bi yā fítimɛ n kīnaa, akū n makū n zòbleri buri kū onigɔ kú zianɔ yā ò dɔ yá? Len ndi kéne le yá, Dikiri Luda? 20 Dikiri Luda, mani pinne derame dɔɔ? Makū n zòbleri n ma dɔ. 21 N yā zókɔɔ pì kè lákū n pɔ yei nà yā kū n ò yāi, akū n tò makū n zòbleri ma dɔ. 22 Dikiri Luda, n zókɔ fá! Oni gbēke lekɔa kúnworo. N baasiro dikiri ke kunlo, lákū o mà kū ó são nà. 23 Dín oni lekɔa kū n gbē Isarailanɔɔ? Andunia burinɔ té buri mèn do pìin n bo n ge n bò, de ògɔ de n gbēnɔ ũ. N n zīda tó bò, n yā zókɔ bonsarenɔ kè n gbē pìnɔne, n pe buri kenɔa kū n tãnanɔ n gbē kū n n bó Misilanɔ are. 24 N Isarailanɔ dite ògɔ de n gbēnɔ ũ ari gɔɔ sīnda pínki. Dikiri, n gɔ n Luda ũ. 25 Dikiri Luda, lé kū n sè makū n zòbleriine kū ma burinɔ yā musu, ògɔ zī kea gɔɔ sīnda pínki. N ke lákū n ò nà 26 de n tó bo manamana ari gɔɔ sīnda pínki. Gbēnɔ ni pi Dikiri Zìkaridemɛ Isarailanɔ Luda ũ. Makū n zòbleri Dauda, ñni ma burinɔ zīni péte, 27 zaakū Dikiri Zìkaride Isarailanɔ Luda, n òmenɛ n pì, ñni ma be kemene ma burinɔ gbānaleki ũ. Abire yāi makū n zòbleri ma kùgbāna kè ma wéke díkīna kemma. 28 Dikiri Luda, mɔkɔmme Luda ũ, n yā náani vī, akū n yā mana dínɔ lé sè makū n zòbleriine. 29 N arubarika da makū n zòbleri burinɔgu sà, n wé nigɔ tényī gɔɔ sīnda pínki. Dikiri Luda, n yā ò n arubarikaa dà makū n zòbleri burinɔgu, onigɔ arubarika vī ari gɔɔ sīnda pínki.

Dauda zìblena buri kenɔ

¹ Abire gbɛra Dauda zìi blè Filisitininɔ à n búsà à n wéra Gata símma. ² À zìi blè Mɔabunɔ, akū à tò ò wùte kɔ sare zíte. À bàa yòm̄ma. Tó à bà pla daguraa dède, àdi bà do dagura tó bēne. Akū Mɔabunɔ gò Dauda zòblerinɔ ũ, akū òdigò táfe bone. ³ Dauda zìi blè Reobo né Adadeza, Zoba kínaa, gɔɔ kū kína pii èra àten gé ɔ tɔ Yuflati swasaredenɔ. ⁴ Akū à a sɔgonɔ kùkū mèn wàa sɔɔro kū sɔgodenɔ gbēnɔn dúbu suppla kū gbē kū ò té gèsenɔ gbēnɔn dúbu baro. Akū à n sɔnɔ gbátĩnɔ zòzò pínki, mèn basɔro mé ò bò. ⁵ Siria kū ò kú Damasukunɔ sù Adadeza leo, akū Dauda n gbēnɔ dède dúbu baro awɛɛpla. ⁶ À gudākparinɔ dìtédite Siria bùsun, akū ò gò a zòblerinɔ ũ, òdigò táfe bone. Dikiri tò Dauda zìi blè gu kū à gèen pínki. ⁷ Dauda Adadeza ìbanɔ wura sēgbakonɔ sète à tàò Yurusalemu. ⁸ À mògotē sète dasidasi Adadeza wēte kū òdi pi Teba kú Berotaioo gūn.

⁹ Kū Amata kína Tohu mà Dauda zìi blè Adadeza zìkarinɔ n pínki, ¹⁰ akū à a né Adoramu zì fɔ kpáa. À a sáabu kpà zì kū à blè Adadezaa yāi, zaakū Tohu zìi kà káao yā. Adoramu sù kū wura pónɔ kū andurufu pónɔ kū mògotē pónɔ, ¹¹ akū kína Dauda kàte Dikiri pò ũ lákū à kè kū buri kū à gbāna blèmmannɔ andurufu pónɔ kū wura pónɔ nà pínki, ¹² Edomunɔ kū Mɔabunɔ kū Amɔninɔ kú Filisitininɔ kú Amalekinɔ. Len à kè le kú pò kú à sì Zoba kína Adadeza, Reobo néaa. ¹³ Len Dauda tó bò le. Kū à zìi blè Sirianɔ à sù, à Edomunɔ dède Guvute Wisiden gbēnɔn dúbu baro plansari. ¹⁴ Akū

à gudãkpãrinɔ dìtedite Edɔmu bùsun dɔ, akū Edɔmu pìnɔ gò a zòblerinɔ ũ. Gu kū Dauda gèen pínki Dikiri dì tó à zì blemɛ.

¹⁵ Daudamɛ Isaraila buri sīnda pínki kína ũ, à yā mana kè a gbēnɔnɛ a zéa. ¹⁶ Zeruya né Yoabumɛ zìkarinɔ gbē zòkò ũ. Ailudi né Yosafatamɛ baarukpari ũ. ¹⁷ Aitubu né Zadoki kū Abiata né Aimɛlekioomɛ sa'orikinɔ ũ. Serayamɛ takadakēri ũ. ¹⁸ Yoyada né Benayamɛ dogarinɔ gbē zòkò ũ. Dauda zīda négògbēnɔmɛ a kpàasinɔ ũ.

9

Dauda gbēkɛkɛna Mefibosɛnɛ

¹ Dauda gbēnɔ là: Solu buri ke dí gōroo? Má ye mà gbēkɛ kɛnɛ Yonatā yāi. ² Solu bɛ zíkɛri ke kun, a tón Ziba, akū ò a sīsi kína Daudanɛ. À a là à pì: Mòkòmme Ziba ũ yá? À wèa à pì: Ee, n zòbleriin ma ũ. ³ Akū kína pì a là à pì: Solu buri ke kun ari tera yá? Má ye mà gbēkɛ kū Luda vī kɛnɛmɛ. Akū Ziba wèa à pì: Yonatā né ke kun ari tera. Eɛɛmɛ. ⁴ Akū kína a là à pì: À kú mámmɛ? Ziba wèa à pì: À kú Amieli né Maki bea zaa Lodɛba. ⁵ Kína Dauda gbēnɔ zì, akū ò sù kāao. ⁶ Kū Yonatā né Mefibosɛ, Solu daikore kà Dauda kīnaa, à kùtɛnɛ à wùtɛ zītɛ. Akū Dauda pì: Mefibosɛ! À wèa à pì: N zòbleriime ma ũ. ⁷ Akū Dauda pìnɛ: Ñsun tó vīna n kūro, zaakū mani gbēkɛ kɛnɛ n de Yonatā yāi. Mani n dizi Solu buranɔ sukpannɛ pínki, ñnigò su pò ble kūmao gɔɔ sīnda pínki. ⁸ Mefibosɛ kùtɛnɛ à pì: Bón makū n zòbleri ũ kū ñni ma wēnda gwaa? Má de lán gbēnda gèè bàroo?

9 Akū kína Dauda Solu zīkeri Ziba sìsi à pìne: Pó kū à de Solu pó ũ kū a bedenɔ póo pínki, ma kpà n dikiri daikorea. 10 Mɔkɔn kū n nénɔ kū n zīkerinɔ, àgɔ a zīte zī kenε, à a pónɔ kekε, de à le àgɔ zàna vī. N dikiri daikore Mefibose nigɔ pó ble kūmao gɔɔ sīnda pínki. Ziba sɔ à négɔgbēnɔ vī gbēnɔn gēro kū zīkerinɔ gbēnɔn baro. 11 Akū Ziba pì kínane: Yá kū ma dikiri kína ò makū a zòbleriine, mani ke pínkime. Akū Mefibose digɔ pó ble kū kínao, à gò lán kína nénɔ doke bà. 12 Mefibose négɔgbē vī, a tón Mika, akūsɔ Ziba bedenɔ gò Mefibose zīkerinɔ ũ n pínki. 13 À kú Yurusalemu, zaakū àdigɔ pó ble kū kínao gɔɔ sīnda pínkime. Àkūsɔ eεεεε.

10

Dauda zìblena Amɔninɔ

1 Abire gbera Amɔni kína gà, akū a né Anuni vùte a gēne ũ. 2 Dauda pì: Mani gbēke ke Naasa né Anunine lákū a de gbēke kèmene yá nà. Akū Dauda a ìba kenɔ zìà, de ò gé Amɔninɔ bùsun ò a laakari kpátene a de gana yá musu. Kū Dauda ìbaa pìnɔ kà gwe, 3 Amɔni kínenɔ pì n dikiri Anunine: Nten da Dauda gbēnɔ zìmma n de gè kpetana yáì de à n laakari kpátennen yá? À n zī de ò su ó wēte asiri gwame, de ò era ò su ò wēte ble kū zìio. 4 Akū Anuni Dauda ìbaa pìnɔ kùkū à n lékāsá kpadonɔ bò, à n pókasanɔ zòzò n pòronɔ dagura, akū à n gbáre. 5 Kū ò ò Daudane, akū à gbēnɔ zì ò gé danle, zaakū wé'i n kū manamana. Ò pìnne: Kína pì, à vute Yeriko ari á lékāsá ká kú gbasa à su.

6 Kū Amōninɔ è Dauda ye n̄ kái doro, akū ò fīna bò gbēnɔne de ò zì káinne: Siria kū ò kú Bete-reobu kū Zobao kū ò té gēsɛnɔ gbēnɔn dúbu baro kū kína Maaka zìkarinɔ gbēnɔn wàa sɔɔro kū Tobudenɔ gbēnɔn dúbu kuri awεεpla. 7 Kū Dauda a baaruu mà, akū à Yoabu gbàrēm̄ma kū zìkarinɔ n̄ pínki. 8 Amōninɔ bò ò zì'ɔ pòro n̄ wēte bīnilea, akū Zoba kū Bete-reobuo Sirianɔ kū Tobudenɔ kū Maaka gbēnɔn kú sèn n̄tēne. 9 Kū Yoabu è ò zì'ɔ pòro a arɛ kū a kpeo, akū à Isaraila zìkari mananɔ sè à n̄ kpaatete ò gé léte Sirianɔa. 10 Akū à zìkari kparanɔ nà a dakūna Abisaine a ɔĩ, akū à n̄ gbáre ò gé léte Amōninɔa. 11 À pì: Tó Sirianɔ gbāna teni ma fu, n̄ mós n̄ ɔ dama. Tó Amōninɔ gbāna teni n̄ fume s̄s̄, mani su mà ɔ damma. 12 Nḡo gbāna, ò ḡogbēke ke ó gbēnɔ kū ó Dikiri wētɛnɔ yā musu. Dikiri ni yā kū à k̄are mana ke. 13 Akū Yoabu kū zìkari kū ò kú k̄aonɔ ḡe Sirianɔa kū z̄io, akū Siria p̄inɔ bàa l̄énn̄e. 14 Kū Amōninɔ è Sirianɔ bàa l̄è, akū ò bàa l̄è Abisaine se ò sì wēte ḡun, akū Yoabu n̄ tó gwe à tà Yurusalemu.

15 Kū Sirianɔ è Isarailanɔ z̄ii blēm̄ma, akū ò èra ò k̄o kàkara. 16 Akū Adadeza gbēnɔ z̄i, ò sù kū Siria kū ò kú Yuflat̄i bara direnɔ, akū ò ḡe Elamu. Sobakime Adadeza zìkarii p̄inɔ gb̄e z̄k̄s̄ ũ. 17 Kū Dauda a baaruu mà, akū à Isarailanɔ kàkara n̄ pínki, à bikù k̄únwo Yodaa à ḡe Elamu. Akū Sirianɔ z̄i'ɔ pòroi, akū ò sì k̄o té. 18 Kū òten bàa lé Isarailanɔne, akū Dauda n̄ dede s̄sgodenɔ gbēnɔn wàa aak̄s̄ kpé basɔɔro kū gb̄e kū ò té gēsɛnɔ gbēnɔn dúbu bupla. Gwen ò n̄ zìkarinɔ gb̄e z̄k̄s̄ Sobaki d̄en. 19 Kū kína kū ò de Adadeza z̄òblerinɔ ũ è Isarailanɔ

zìi blèrínna ɛ, akū ò lédokɔnɔ kè kū Isarailanɔ ò gè ñ zòblerinɔ ũ. Vĩna Sirianɔ kù, odi gé ò ɔ da Amɔninɔa doro.

11

Dauda yena Basebai

¹ Kū í bò wèen, gɔɔ kū kɪnanɔ dì gé zì ká, akū Dauda Yoabu zì kū a ìbanɔ kū Isarailanɔ ñ pínki. Ò Amɔninɔ ásarú kè, akū ò líka Rabai. Dauda sɔ à kú Yurusalemu. ² Kū ɔkɔsi kè, akū Dauda fùte a gádoá, àten líka a kpé musu. Zaa kpé musu gwe akū à nɔgbè ke è, àten zú o. Nɔgbè pì bi nɔ maname manamana, ³ akū à gbè zì ò nɔgbè pì yā gbeka. Akū ò pìnɛ: Eliamu né Baseban gwe, Iti buri Uria nanɔme. ⁴ Akū Dauda gbènɔ zì ò a sísi. Kū à sù, akū Dauda wùte káao, akū nɔgbè pì tà be. Àkū sɔ, a okūna gbàa bò dufume. ⁵ Kū à nòò sì, akū à légbāzā kè Daudanɛ à pì a nòò sì.

⁶ Akū Dauda gbè zì Yoabua à pì: Ñ Iti buri Uria gbaremenɛ. Akū Yoabu a gbàrenɛ. ⁷ Kū Uria pì sù, akū Dauda Yoabu aafia gbèka kū zìkarinɔ kū zì kū òten káo. ⁸ Akū Dauda pìnɛ: Ñ tá be ñ zú o. Kū Uria bò kɪnabea, akū kɪna gbè zì kú pòbleo. ⁹ Ama Uria dí tá a bearo, kɪnabe gānu gūnn à ñ kū kɪnabe zìkerinɔ. ¹⁰ Kū ò ò Daudanɛ ò pì, Uria dí tá a bearo, akū à Uria là à pì: À de n bo tái n sumɛ gwɛɛ? À kè dera ñdi tá beeroo? ¹¹ Uria wèa à pì: Àkpati kū Isarailanɔ kū Yudanɔn kú bizakutanɔ gūn. Ma dikiri Yoabu kū a gbènɔn kú zìlan. Mani fɔ mà tá be mà pò ble mà í mi, mà wùte kū ma nanɔoro. Kū

n kunnao mani yā pìi taka kero. ¹² Akū Dauda pìne: Ì gō la gbāra dɔ, zian mani n gbare. Akū Uria gò Yurusalemu zī birea kū a gu làa dɔnao dɔ. ¹³ Dauda a sisi à pò blè à í mì kāao, akū Dauda í kàkanε. Ama kū à bò ɔkɔsi, à gèε à ì kū a dikiri kína zīkerinɔme, adi tá a bearo. ¹⁴ Kū gu dò Dauda takada kè Yoabune, akū à Uria gbàreɔ. ¹⁵ Takada pìi gūn à pì: À Uria doñne are gu kū zì pāsīn, à bo a kpε de ò le ò a dε.

¹⁶ Gɔɔ kū Yoabu ten lika wēte pìii, akū à Uria dà gu kū à dō gōsa gbānanɔn kún. ¹⁷ Kū wētedenɔ bòte òten zì ká kū Yoabuo, ò Dauda zìkari kenɔ dèdε. Iti buri Uria kú ñ té.

¹⁸ Akū Yoabu gbē zì Daudaa de à zì yā gbāne pínki. ¹⁹ À pì zìrii pìine: Tó n zì yā gbà kīnane pínki n laka, ²⁰ tó a nèεε fùte à n la à pì: Bó mé à tò a na wētei kānikāni kū zìioo? Á dō kū bīnimusudenɔ dì kà gbareñyī zīteroo? ²¹ Dí mé à Gidion né Abimeleki dèε? Nɔgbē mé à ɔ sò wísilɔgbēei zaa bīni musu, akū à a dè Tebeziroo? À kè dera a na bīnii kānikāni lεε? Tó à ònne lε, ñ onε a zòbleri Uria, Iti buri gà dɔ. ²² Akū zìrii pìi dà zén. Kū à kà Dauda kīnaa, à yā kū Yoabu dàare òne pínki. ²³ À pì: Gbēnɔ bòte wēte gūn òten gbāna mɔwεre bīni kpεme, akū o pεñma ari ñ wēte bīnilea. ²⁴ Ñ kàzurinɔn kú zaa bīni musu, akū ò kà fà n gbēnɔ té zīte ò n gbēkenɔ dèdε. N zòbleri Uria, Iti buri gà dɔ. ²⁵ Akū Dauda ò zìrii pìine: Ì o Yoabune àsun tó yā pìi kenε ñniro. Òdigō dō gbē kū zì ni ñ blero. À zì ká kū wētepidenɔ kū gbānao à wēte pìi kakate. Ì a gba swè lε. ²⁶ Kū Uria nanɔ mà a zā

gà, à ɔ̀ d̀. ²⁷ Kū ò gèè kè ò làka, Dauda gbẽ̀nɔ̀ zĩ ò sù k̄aaɔ̀ a bea, akū à ḡɔ̀ a nɔ̀ ũ. À né ì k̄aaɔ̀ ḡɔ̀gbẽ̀ ũ, akū yā kū Dauda kèè p̄i kè Dikirinɛ̀ ĩni.

12

Annabi Natā kpākēna Daudai

¹ Dikiri Natā zĩ Daudaa. Kū à kà, à p̄inɛ̀: Ḡɔ̀gbẽ̀ gbẽ̀nɔ̀n pla kenɔ̀ mé ò kú w̄ɛ̀ɛ̀ ke gūn, gbẽ̀ do bi aruzekedeɛ̀, gbẽ̀ do s̄ takasidemɛ̀. ² Aruzekede p̄i s̄nɔ̀ kū zùnɔ̀ v̄i dasidasi, ³ takaside p̄i s̄ à p̄oke v̄iɔ̀, s̄ n̄unu f̄itinna mèn doken à lù. Akū à dàto ari à z̄k̄ k̄ a bea kū a n̄nɔ̀. Òdiḡ p̄ dok̄nɔ̀ ble òdiḡ í mi ta dok̄nɔ̀n, àdi w̄ute a p̄ɔ̀ɛ̀, akū àteni a gwa lán a z̄ida n̄nɔ̀kp̄are bà. ⁴ Kū nib̄ɔ̀ k̄pa aruzekede p̄ia, akū adi we à s̄ ke z̄u k̄ a kp̄asaa gūn à nib̄ɔ̀ p̄i yàri k̄eoro. Takaside s̄ n̄unu f̄itinna p̄in à sia à a nib̄ɔ̀ p̄i yàrii k̄eò. ⁵ Akū Dauda p̄ f̄è aruzekede p̄i yā musu manamana, à p̄i Natānɛ̀: Dikiri kun! À k̄ ò gbẽ̀ k̄ à yā p̄i k̄ demɛ̀. ⁶ Lákū à k̄ lɛ̀ nà, adi a w̄enda gwaro, ani s̄ p̄i f̄ina bo lɛ̀u siik̄. ⁷ Akū Natā p̄i Daudanɛ̀: M̄k̄mm̄ ade p̄i ũ. Dikiri Isarailanɔ̀ Luda mé à yā dí ò à p̄i: Ma n ka Isarailanɔ̀ k̄ina ũ, ma n bo Solu ɔ̀, ⁸ akū ma n dikirii p̄i be kp̄amma, ma a nɔ̀nɔ̀ n̄annɛ̀ n ɔ̀. Ma Isarailanɔ̀ k̄ Yudanɔ̀ kp̄amma n gbẽ̀nɔ̀ ũ. Tó adinɔ̀ k̄emma f̄iti yā, de mà a p̄andenɔ̀ karannɛ̀ d̄. ⁹ B̄yāi n ma yā gya bòò? N yā k̄ má yeiro k̄, n Iti buri Uria dè k̄ f̄ɛ̀nɛ̀dao, n a nɔ̀ sia n sè. N tò Am̄ninɔ̀ a dè z̄i gūn. ¹⁰ Zaa gb̄ara yā p̄ās̄i ni k̄ n bea ziki doro, zaakū n ma gya bò, n Iti buri Uria nɔ̀ sia n sè. ¹¹ Akū Dikiri èra à yā dí ò d̄ à p̄i: Ñ ma! Mani tó n z̄ida bedenɔ̀ sunyĩ k̄enne. Mani

n nɔɔ sɪmma mà ñ kpá n gbēdake kea n wára, ani wúte kúnwo gupuraa. ¹² N yá pìi kè asiri gümme. Makū sō mani yá pìi kenne gupuraa Isarailaɔ wára ñ pínki.

¹³ Akū Dauda pìi Natāne: Ma durunna kè Dikirine. Akū Natā pìne: Dikiri n durunna kemma, ñni garo. ¹⁴ Ama lákū n dɔke kū Dikirio manamana nà yá pìi kēnaa musu, négōgbē kū nōgbē pìi ì kúnwo ni game. ¹⁵ Kū Natā tà be, akū Dikiri tò né kū Uria nana ì kū Dauda pìi gyā kù. ¹⁶ Akū Dauda ten Luda wé ke né pìi yá musu kū léyīnaa, gwāani àdigō wúte zīteme. ¹⁷ A be gbē zōkōɔ digō zēala de ò a fute zīte, ama àdi wero, àdi pò ble kúnworo. ¹⁸ A goro supplade zīn né pìi gà. Vīna Dauda ìbana kù, odi fō ò òne kū né pìi gāro. Ò pìi: Goro kū né pìi kun, o yá òne, adi ó yá maro. Deran óni one nà sà kū né pìi gāa? Ani yá vāni ke. ¹⁹ Dauda è a ìbana ten yá kpāni okōne, akū à dō kū né pìi game. À ñ lá à pìi: Né pìi gān yá? Akū ò wēa ò pìi: Ee! À game. ²⁰ Dauda fùte zīte à zú ò, à nísi dōko à a pókasaɔ líte, akū à gēè à kùte Dikirine a kpén. Kū à èra à tà be, à pòble gbēka, akū ò kpāa à blè. ²¹ A ìbana a là ò pìi: À kè dera nten yá ke lēè? Goro kū né pìi kun, n lé yī n sō dō. Kū à gà sà, n fute n pò blè. ²² À wēmāma à pìi: Goro kū né pìi kun, ma lé yī ma sō dō, zaakū ma pìi, ke Dikiri ni ma wēnda gwa à tó né pìi gō kun gwēè, dí mé à dō? ²³ Lán à gà nà sà, bōyāin manigō léyīna dō? Mani fō mà a vun yá? Mani gé a kīnaa, ama ani era à su ma kīnaaro.

²⁴ Dauda a nana Baseba laakarīi kpātene, akū à gēè à wúte kāao. À né ì gōgbē ũ, akū à tó kpāne Sulemanu. Dikiri yei, ²⁵ akū à annabi Natā zīa à

tó kpà né pìine Yedidaya Dikiri yenyĩ pì yāi.

Raba sina Amōninō

²⁶ Ari tera Yoabu kpé àten zì ká kù Amōninō zaa Raba, akū à kínabe sì. ²⁷ Akū à gbēnō zì Daudaa à pì: Ma zìi kà kù Rabadenō, akū ma n ítoki sì. ²⁸ N zìkari kparanō kakara sà, n mós n lika wēte pìii n sí. Tó lenlo, mani sí, oni ma tó kpáne. ²⁹ Akū Dauda zìkarinō kàkara n pínki, à gèe à lète Rabaa à sì. ³⁰ Ò n kína wura fùraa gò a mìa ò kù Daudane. A tìkisi kà kiloo baraaakuri, akūsō gbè bèereede kúa. À wēte pì pónō nàkōa manamana, ³¹ akū à gbē kù ò kú gweno kùkù à bòte kùńwo, à n dá sàkasaka zīn kù diga zīo kù kpása zīo, akūsō à tò ò kúnku bò. Len à kè Amōni wētenōne le pínki, akū à era à tà Yurusalemu kù a zìkarinō n pínki.

13

Aminō yena a dāre Tamai

¹ Abire gbera Dauda né Abusalomu dāre mana vī, a tón Tama, akū Dauda né Aminō yei. ² Yā pì ten wari dō Aminō pìia ari à kà gyākena a dāre Tama pì yāi, zaakū à gōgbē dōro, ani fō à yāke kenere. ³ Aminō gbēnna ke vī, a tón Yonadabu, Dauda vīni Simeea néme. Yonadabu òndō gbāna, ⁴ akū à Aminō là à pì: À kè dera n kine'ina n mēe dīgō yōna lākū gu dīgō dō nà lee? Īni omeneroo? Akū Aminō wèa à pì: Má ye ma dakūna Abusalomu dāre Tamaimē. ⁵ Akū Yonadabu pìne: N gē n wúte n gádoa lākū gyāren n ū bà. Tó n de sù n gwa, n one n ye n dāre Tama su à pòble kpámma. À su à keke n wára de ògō

e, gbasà à nannɛ n ɔĩ. ⁶ Akū Aminɔ wùtɛ lán gyāre bà. Kū kína sù a gwa, akū à pìne: N tó ma dāre Tama su à kàra kemene ma wára, à namene ma ɔĩ. ⁷ Akū Dauda gbě zĩ Tamaa a bea à pì: N gɛ n vɛni Aminɔ kpén n pòble kene. ⁸ Kū Tama gɛ a kpén, à a lè wutena, akū à wísiti yà à kàraa kàsao a wára. ⁹ Akū à ta sè à kàraa pìi kànnɛ. Aminɔ gɛ sòí à pì: N pé gbɛnɔa ò bɔtɛ n pínki. Kū gbě kū ò kú kãaonɔ bɔtɛ n pínki, ¹⁰ akū à pì Tamane: N su kū pòble pìio kpéne gūn la n namene ma ɔĩ. Akū Tama kàra kū à kɛɛ sè à gèò a vɛni Aminɔ pì kĩnaa kpéne gūn. ¹¹ Kū à nài, àtɛn su kpáa à só, akū à a dāre pìi kù à pì: N tó mà wùtɛ kúnwo.

¹² Akū à pì a vɛni pìine: Oi! Nsun gbāna mɔmɛnɛro. Zaakū ó Isarailanɔ odì yā dí taka kero. Nsun yā dɔrɔsari bire taka kemɛnɛro. ¹³ Makū, mán mani gɛn kū wé'iyā dioo? Mɔkɔn sɔ, Isarailanɔ ni n ditɛ gbě pā ũ. N sùru kɛ! N a yā o kɛnane, ani gɛ ma kpámmairo. ¹⁴ Adi we à a yā màro. À gbāna mòne, akū à kùsia à wùtɛ kãao. ¹⁵ Akū Aminɔ zãagu pāsīpāsī. Zāngu kū à sè kū Tama pìio de yenyī kū à vī kãao yāla. Akū à pìne: N fute n bo. ¹⁶ Akū nɔgbě pìi pì a vɛni pìine: Oi! N penama taari zɔkɔ de pò kú n kɛmɛnela. Kū abireo adi we à a yā màro. ¹⁷ Akū Aminɔ a zĩkeri kɛfenna sisi à pì: N pé nɔgbě díkĩnaa à bomene ma kpén, n gbà ta n a mòne dan. ¹⁸ Akū a zĩkerii pì a sè à bò kãao bàai, à gbàa tà à a mòne dàn. Nɔgbě pìi uta gbāna dana, zaakū uta bire takan kína nɛnɔkpare lésinɔ dìgɔ dana. ¹⁹ Akū Tama túbu gbě a mìa, à a uta gbāna kū à danaa pìi

gà à kě̀ à ɔ̀ dì a musu, àtɛn ɔ̀ ɔ̀ dɔ̀ àtɛn tá.

²⁰ A dāgɔ́ dadokɔ́nɔ̀de Abusalomu pìne: N dāgɔ́ Aminɔ̀ wùte kúnwon yá? Ìsun o gběke maro, zaakū n dāgɔ́mε. Ìsungɔ́ yā pì kúna n swèε gúnlo. Akū Tama wùte a dāgɔ́ Abusalomu bea kū pɔ̀yakao.

²¹ Kū kína Dauda yā pìi mà, a pɔ̀ fè̀ manamana.

²² Abusalomu dí yáke o Aminɔ̀nεro, yā vāni ke a mana. A zàagu, kū à kùsi a dāre Tamaa yāi.

Abusalomu Aminɔ̀ denaa

²³ Wè pla gbera Abusalomu kú Baali Azo, Eflaimu bùsu lén kú a sākākēɛrinɔ̀, akū à kína néno sisi pɔ̀nna pɔ̀blea n pínki. ²⁴ Akū à gèε à kína lè à pì:

Kína, òtɛni makū n zòbleri sānɔ̀ ká zɔ̀zɔ̀. Mɔ̀kɔ́n kū n ìbanɔ̀ áni gé kúmaoro? ²⁵ Akū kína wè a né pìia à pì:

Oi! Óni fɔ̀ ò gé ó pínkiro. Óni kenne aso ũ. À nàkara kāao, ama adi géro, akū à sa mana òne. ²⁶ Akū

Abusalomu pì: Tó ìni géro, n tó ma vīni Aminɔ̀ gé kúoo. Kína a là à pì: Bóyāi n ye à gé kúnwoo?

²⁷ Abusalomu nàkara kāao, akū kína tò Aminɔ̀ gèε kāao kú a né kparanɔ̀ n pínki.

²⁸ Abusalomu yā dìte a gbēnɔ̀ne à pì: À sã kpá! Tó

í Aminɔ̀ kù, tó ma òáre à a zɔ̀, à a de. Àsun tó vīna á kúro. Makū mé ma á dán! À ze gbāna à gɔ̀gběke ke. ²⁹ Abusalomu gbēnɔ̀ kè lákū à ónne nà ò a dè,

akū kína né kparanɔ̀ fùte ò dì n baragbāsɔ́nɔ̀ kpe ò bàa lè. ³⁰ Gɔ̀rɔ̀ kú ò kú zén, Dauda a baaruu mà ò pì: Abusalomu kína néno dède n pínki, n gběke

dí gɔ̀ro. ³¹ Dauda fùte à a pókasanɔ̀ gà à kě̀, akū à wùte zīte. A ìbanɔ̀ zei kú n pókasanɔ̀ kēkēna. ³² Akū

Dauda vīni Simεa né Yonadabu pì: Baa, ìsungɔ́ da ò n né kefennanɔ̀ dède n pínkiro, Aminɔ̀ mé à gà ado. Ò

yā pìi dè Abusalomu wéa zaa gɔɔ kũ Aminɔ kùsi a dāre Tamaame. ³³Ma dikiri kína, òsungɔ yā pìi kũna n nèsee gūnlo. N nэгɔgbēnɔ dí gaga í pínkiro, séde Aminɔ ado. ³⁴Abusalomu sɔ à bàa lè.

Kũ kefenna gudākpāri wé zù, à è ò té Oronaimu zén sīsigerēei dasidasi. À gèe à pìi kínane: Ma gbēnɔ è té sīsigerēei Oronaimu kpa. ³⁵Akũ Yonadabu pìi kínane: N è yá? N nénɔ mé òten su gwe lákũ ma ònne nà. ³⁶Kũ à yā pìi ò à làka, akũ kína né pìnɔ kà gònɔ, òten wēnda ɔɔ dɔ. Kína kũ a ìbanɔ ɔɔ dɔ ò í pínki manamana dɔ.

³⁷Abusalomu bàa lè à tà Amiudu né Talamai, Gesuru kína kīnaa. Kína Dauda sɔ àdigɔ a né gana ɔɔ dɔ gɔɔ sīnda pínki. ³⁸Kũ Abusalomu bàa lè à tà Gesuru, à kú gwe ari wè aakɔ. ³⁹Kũ kína Dauda nèsee kpàte Aminɔ gana yā musu, akũ àten Abusalomu begē ke sà.

14

Abusalomu suna Yurusalemu

¹Zeruya né Yoabu dɔ kũ kína pɔ kpé kú Abusalomua, ²akũ à gbēnɔ zì Tekoa, ò nɔgbē òndɔde ke sè ò sù káao. Akũ à pìine: N ke lándɔ nten wēnda ke bà. N gyaanɔ pókasanɔ da. Nsun nísi dɔkɔro. N ke lákũ nɔgbē kũ a gbē gà àteni a ɔɔ dɔ à gii kè bà. ³N gé kína kīnaa le, ò yā díkína onē. Akũ Yoabu yā kàka nɔgbē pìine. ⁴Kũ Tekoa nɔgbē pìi gèe à kína lè, à kùtene kũ à mīio zīte à pìi: Kína, ò ma mì sí! ⁵Akũ kína pìi a là à pìi: Bón í yeii? À wèa à pìi: Gyaanɔn ma ũ, ma zā gà. ⁶Makũ n zòbleri, má nэгɔgbēnɔ vī gbēnɔn pla. Kũ òten fīti ke í kɔ tēne bura, gbēke kun à í

kpaatero. Akū gbě do a gbě do lè à dè. ⁷ Akū ma bedeno fùte ní pínki, ò pì makū n zòbleriine mà a né kū à a gběndo dèe pì kpárima ò de, kū à a gběndo dè yāi. Ò ye ò yàka mì'oro téde kū à gòmene túbibleri ũ pì té dème, de ma zā súnḡ tó ke buri vī andunia ḡn dororo yāi. ⁸ Akū kína pì nḡgbě pìine: Ñ tá be, mani yā gwa n yā pìi musu. ⁹ Akū Tekoa nḡgbě pìi pì: Ma dikiri kína, taari pì wí ma musu kū ma de bedeno, mḡkḡn ñḡḡ kun taari sari kū n kíkeo. ¹⁰ Akū kína pì: Tó gběke lé pà yā piia, ñ mḡ kāao ma kīnaa la, aní le à wari dḡmma dororo. ¹¹ Akū nḡgbě pìi pì: Kína, ñ sì kū Dikiri n Ludao, de mḡrakari sún ma né mèn do kū à ḡḡ lakiti kero yāi. Akū kína pìi pì: Kū Dikirio n né pìi mīkā ke ni léte zītero. ¹² Akū nḡgbě pìi pì: Ma dikiri kína, makū n zòbleri ñ ma gba zé mà era mà yā onne. À wèa à pì: Ñ o! ¹³ Akū à pìine: Bóyāi n yā dí taka kpàkūsū kū Luda gběḡḡ? Yā kū n òmene mé à n da yān, zaakū ñdi gbě kū n pèaa gbese n su kāaoro. ¹⁴ Ó pínki óni ga, ónigḡ de lán í kū à kòte zīte gběke dí le à sète dororo bà. Luda di gbě kū ò pèaa wèndi boro, àdi zé wete ade era à suawame. ¹⁵ Ma su yā pì o ma dikiri kīnaneme, zaakū gběḡḡ tò vīna ma kū. Akū makū n zòbleri ma pì mani yā pì onne. Òdigḡ dḡro ke ñni ma wékèna sí ¹⁶ ñ ma bo gbě kū à ye à makū kū ma néo zīte kū Luda tòwete sí ó oī. ¹⁷ Ma dikiri kína, makū n zòbleri ma pì n yā ni tó ma laakari kpáte, zaakū ñ de lán Luda malaikaa bàme, ndi sā kpá yā mana kū a vāniooi pínki. Dikiri n Luda ḡḡ kú kúnwo.

¹⁸ Akū kína pìine: Ñsun ḡí yā kū mateni n la onaaio. Akū nḡgbě pìi pì: Ñ o ma dikiri kína!

19 Akū kína a là à pì: Yoabu lé kú yā pì gūn yá? Nɔgbē pì wèa à pì: Ma dikiri kína, kú n kunnaao yā kú n òo pì gèna are kú kpeo vīro. Ee, n zòbleri Yoabu mé à yā pì kàkamenε pínki. 20 N zòbleri Yoabu kè le, de à le à yā kú à lokona tera díkū keke yāime. Ma dikiri, n òndō lán Luda malaikaa bàme, n yā kú à kè andunia gūn dō pínki. 21 Akū kína gèe à ò Yoabune: Tò, mani yā pì ke sà. N gé n kefenna Abusalomu gbese n su kãao. 22 Akū Yoabu kùte kínane kú à m̀io, à a sáabu kpà à pì: Ma dikiri kína, makū n zòbleri, ma dō gbāra sà kú ma yā kàngu, zaakū n ma yā mà. 23 Akū Yoabu fùte à gèe à Abusalomu gbèse zaa Gesuru à sù kãao Yurusalemu. 24 Akū kína pì: N one à gé vute a zīda bea, ó wé ni ke siikōro. Akū Abusalomu gèe à vùte a bea, odi wé sikōle kú kínaoro.

25 Gō mana ke kú Isarailano té lán Abusalomu bàro. Òdigō a manake yā o manamana. Sena zaa a gèseea ari à gèe pé a m̀dangura mamberu ke kúaro. 26 Àdigō a mì bo wè kú wèεome. Àdi kea tikisi. Tó à bò, àdi yō kilooa, a tikisii digō de kiloo plala. 27 À négōgbēno ì gbēno n aakō kú nénōgbēo mèn do. Nénōgbē pì tón Tama. Nɔ maname. 28 Abusalomu kú Yurusalemu ari wè pla wésina kínale sari.

29 Akū à Yoabu sìsi à géare kína kīnaa, ama Yoabu dí we à sù a kīnaaro. Akū à èra à a sìsi dō, adi we à sùro. 30 Akū à pì a zīkerinoε: À Yoabu bura kú à kú ma pó sare gwa, a nagā mà. À gé à té sōa. Akū Abusalomu zīkerino gèe ò té sō Yoabu bura p̄ia. 31 Akū Yoabu fùte à gèe Abusalomu bea, à a là à pì: Bóyāi n zīkerino té sō ma buraaa? 32 Akū

Abusalomu wèa à pì: Ì gwa, ma gbē zìmma ma pì ñ mó mà n zĩ kínaa, de ñ a la bó mé à tò à ma gbese zaa Gesuru à sù kúmaoo? Ma kunna gwe sánamene de gu díla! Má ye mà kō e kú kínao tera. Tó má taari ke vī, à ma de. ³³ Akū Yoabu gèe à yā pìi ò kínanē. Akū kína Abusalomu sìsi. Kū à sù, à kùtene kū a mīio zīte. Akū kína lé pèa.

15

Abusalomu bona Dauda kpɛ

¹ Abire gbera Abusalomu sōgo lè a zīdanē kū sōno kū gōgbēno gbēnon bupla akuri kū onigō bàa lé a arenō. ² Àdi fute kōnkōkōnkō àgō zena bīnile sare. Tó gbē yā vī kū a gbēdakeo àten géo kína kínaa à kekene, Abusalomu di ade sísi à pine: Wēte kpaten n bonn? Tó à wèa à pì: Makū n zòbleri ma bo Isaraila buri dí gūmmē, ³ akū Abusalomu di pine: N yā nname, à zé vī, ama kína gbēke kun à sã kpá n yairo. ⁴ Abusalomu di era à pi: Tó ò ma ke yākpatekeri ū ó būsun, gbē kū à yā vī ke gbē kū àten gbē gbeka yākpatekēkia n pínki anigō su ma kínaa, manigō a yā kekene a zéa. ⁵ Tó gbē sù à kùte a are, àdi ɔ bo à ade kū à lé péa. ⁶ Len àdigō ke le Isaraila kū òten su yākpate ke kína kínaanone n pínki, akū n swèe tà a kpa.

⁷ Wè siikō gbera à pì kínanē: Ì ma gba zé mà gé la kū ma dà Dikirine sa o zaa Eblōnu. ⁸ Makū n zòbleri ma lé pìi gbēne gɔɔ kū má kú Gesuru, Siria būsun ma pì: Tó Dikiri tò ma su Yurusalemu, mani sa oa Eblōnumē. ⁹ Kína pine: Ì gé ñ su aafia! Akū à fùte à gèe Eblōnu. ¹⁰ À gbēno zì Isaraila burino kínaa pínki

à pì: Tó a kuru'ũ mà dɔ, à pi Abusalomu mé à kí blè Eblɔnu. ¹¹ Gɔɔ kũ àten fute Yurusalemu à gbɛnɔ sisi gbɛnɔn wàa do ò gé kááo, akũ ò gèe kũ nèse mèn doo, ò yá pìi asiri dɔro. ¹² Gɔɔ kũ àten sa o, à Gilo gbɛ Aitofeli, Dauda lédammarii sisi zaa a be wɛten, akũ lékpakūsūna Daudai ten kara. Gbɛ kũ ò kú kũ Abusalomuonɔ dasi ten kara.

Dauda bàasinaa

¹³ Baarukparii sù à pì Daudane: Isarailanɔ swèè tà Abusalomua. ¹⁴ Akũ Dauda pì a ìba kũ ò kú káao Yurusalemunɔne: À fute ò bàa lé. Tó ódi ke lero, óni le ò bo Abusalomu ɔĩro. Ò ke likalika. Tó ódi ke likalikaro, ani ó le la, ani ó ásarú ke, ani wɛtedenɔ dɛdɛ kũ fɛnɛdao. ¹⁵ Kína ìbanɔ pìne: Ó dikiri kína, yá kũ n zɛo pínki, ókɔnɔ n zòblerinɔ o lakame. ¹⁶ Akũ kína dà zén. A bedenɔ bò ò tɛi n pínki, ama à a nɔ yìgisaride mèn kurinɔ tò gwe ògɔ be gwa. ¹⁷ Kína dà zén le kũ a gbɛnɔ. Kũ ò kà wɛte kpe, à litɛ à zè. ¹⁸ Akũ a ìbanɔ pínki kũ a dogarinɔ kũ Gatadenɔ gbɛnɔn wàa aakɔ kũ ò tɛi zaa Gatanɔ gète n pínki.

¹⁹ Akũ kína pì Gata gbɛ Itaine: Bóyái nten gé kúoomɛɛ? Ñ era n tá ñgɔ kú kũ kína dufuo, zaakũ gbɛ zítɔmɛ n ũ, n bo n bùsumɛ. ²⁰ N suna dí gɔɔ pla kero, akũ n ye ñgɔ likara zɔ kúoo yá? Má dɔ gu kũ maten génlo. Ñ n gbɛnɔ kakara n tá kúńwo. Dikiri gbɛke kũ náani yáo kenne. ²¹ Akũ Itai wèa à pì: Ma dikiri kína, kũ Dikiri kunnaao kũ n kunnaao, gu kũ n kun pínki, makũ n zòbleri manigɔ kú gwemɛ, mani ga yá kesɔ manigɔ kun yá. ²² Akũ Dauda pìne: Ñ domɛne are ò gé! Akũ Gata gbɛ Itai èra à dà zén kũ a gbɛnɔ kũ a danɛ kũ ò kú káaonɔ n

pínki. ²³ Kū òten gē zéla n pínki, akū būsudenɔ wiki lè. Kū kína bikù Kidironua, akū n pínki ò gbáranna zé sè.

²⁴ Zadɔki kú gwe dɔ kū Levinɔ n pínki. Ò Luda bàka kunna kúnwo àkpati sena. Ò àkpatii pì d̄ite Abiata sare ari gbēnɔ b̄ɛte w̄eten ò làka n pínki.

²⁵ Akū kína pì Zadɔkinε: Ñ Luda àkpati sé n gēo w̄ete gūn. Tó ma Dikiri pɔnna lè, ani tó mà su mà wé siale kū a kúkió. ²⁶ Tó à pì ma yā dí káaguro s̄o, ma laka. À kemene lákū à k̄are mana nà. ²⁷ Akū kína èra à pì sa'ori Zadɔkinε: Wégupu'eriime n ũroo?

Ñ era n tá w̄ete gūn aafia kū n né Aimazao kū Abiata né Yonatao. À tá kū á né gbēnɔn pla pìno.

²⁸ Maniḡo zena swabikúkia s̄ente ari mà baaru maáwa. ²⁹ Akū Zadɔki kū Abiatao Luda àkpatii sè ò tào Yurusalemu, akū ò ḡò gwe. ³⁰ Dauda ten Kùkpe s̄is̄i kū àten s̄o dɔ. À pó kù a m̄ia, à kyate kpanaro.

Gbē kū ò kú k̄aonɔ pó kù n m̄ia n pínki, òten s̄o dɔdɔ òten géo. ³¹ Kū ò pì Daudane Aitofeli kú gbē kū ò zè kū Abusalomuonɔ té, akū Dauda adua kè à pì: Dikiri, n tó a lédamma ḡo de yā fayasaride ũ.

³² Kū Dauda kà s̄is̄i m̄is̄onte, gu kū donȳikeki kún, Aki gbē Usai sù à dàale, a uta kēna akūs̄o b̄usu kú a m̄ia. ³³ Dauda p̄ine: Tó n ge k̄umao, ñiḡo demene aso ũme. ³⁴ Tó n era n ta w̄eten, akū n ò Abusalomune a zòbleriime n ũ s̄o, ñni Aitofeli lédamma gboromeneme. Ñ pine a de zòbleriime n ũ yā, ama tera n ḡo a zòbleri ũme sà. ³⁵ Sa'orino Zadɔki kū Abiatao ḡo kú k̄unwo gwe. Ñ yā kū n mà k̄inabea babañne pínki. ³⁶ Ñ né gbēnɔn planɔn kú k̄unwo gwe, Zadɔki né Aimaza kū Abiata né

Yonatão. Tó n yáke mà, ò né pìnɔ zĩ ò su ò omene.
³⁷ Akū Dauda gbēnna Usai pìi tà, à kà Yurusalemu
 ɔɔɔ kū Abusalomu ten gē.

16

Dauda kū Zibao kū Simeio

¹ Kū Dauda vī sīsī mīdangurala fīti, à è Mefibose begwari Ziba gāarii yī zaakinɔne mèn pla, àten su daale. Ò burodi sēna mèn wàa do kū geepi kàraao mèn basɔɔro kū kaka né kàraao mèn basɔɔro kū sēwēo tūru do. ² Akū Dauda Ziba là à pì: Bó mé à tò n su kū abireoo? Ziba wèa à pì: Kína, zaakinɔ bi n bedenɔ pómē ò dia. Burodi kū kàranɔ bi n gbēnɔ pómleme. Wē sō, gbē kū ò kpàsa gbáranna gūnnɔ pómīnaame. ³ Kína a là à pì: N dikiri kū à kè sari daikore kú máme? Ziba wèa à pì: À gǔ Yurusalemu, zaakū àten da Isarailanɔ a ká a dizi kpatan gbāramē. ⁴ Akū kína pìnē: Pó kū Mefibose vī pínki gǔ n pó ũ. Akū Ziba pì: Má kúte dí! Ma dikiri kína, ò tó màgǔ n pɔnna le le.

⁵ Kū kína Dauda nà Bahurimui, à è gǔgbē ke bò. A tón Simeī, Gera néme. Àkūme buri dokɔnɔ kū Solu bedenɔ. À bò wēte gūn, àten Dauda ká. ⁶ Àten gbè zuzu kína Daudai kū a gbēnɔ, bee kū a zīkarinɔ kū a dogarinɔn kú a ɔplai kū a ɔzeio í pínki. ⁷ Àteni a sōsō àten pi: Ì gé! Ì gé! Gbēderi! Pó pā! ⁸ Dikiri fīna bònne Solu kū n kí blè a gēne ũ bedenɔ dedena yā yāi. Dikiri n bo kpatan à n né Abusalomu kàn. Ásarū kēm̄ma sà, zaakū gbēderiime n ũ. ⁹ Akū Zeruya né Abisai pì kīnane: Ma dikiri kína, à mana gbēda gè dí gǔ n sōsōro. Ì tó mà gé mà a mì zō. ¹⁰ Akū

kína pì: Zeruya néno, bó mé à ó kakaraa? Tó Dikiri mé à òne à ma s̄s̄s̄, akū àtèni ma s̄s̄s̄, dí mé ani f̄s̄ à a la à pi, bóyāi àtèn ke l̄e? ¹¹ Akū Dauda ò Abisaine kū a l̄ban̄o ní pínki à pì: À gwa, ma z̄īda né'ina mé àtèn w̄eṭe à ma d̄e. Oni Biliaminu buri díkīna p̄o ó d̄o yá? À a tó gwe. Tó Dikiri mé à p̄ine à ma s̄s̄s̄, à maname. ¹² Òdiḡo d̄ōro ke Dikiri ni ma wari d̄s̄ à f̄īna bomene kū yā manao s̄s̄s̄ kū òtèn kemene gbāra yāi. ¹³ Kū Dauda té z̄én kū a gb̄ēno, Simei té s̄īs̄i p̄ānde kpadoi, àtèni a s̄s̄s̄ àtèni gb̄è zuzui àtèn b̄usu f̄ā. ¹⁴ Kū kína kū a gb̄ē kū ò kú k̄āon̄o kà swai, ò kp̄asa, akū ò k̄amma b̄ò gwe.

Abusalomu kana Yurusalemu

¹⁵ Abusalomu kà Yurusalemu kū Isarailano ní pínki. Aitofeli kú k̄āo. ¹⁶ Akū Dauda gb̄ēna Usai, Aki gb̄ē ḡē à Abusalomu l̄è à p̄ine: Luda n d̄s̄ kū aafiaao Zaaki! Luda n d̄s̄ kū aafiaao Zaaki! ¹⁷ Abusalomu a là à pì: Gb̄ēke kū ní v̄ī kū n gb̄ēnaon gwe yá? Bóyāi nídi gé kú n gb̄ēnaoroo? ¹⁸ Usai w̄èa à pì: Lenlo! Gb̄ē kū Dikiri kū gb̄ē díkīnan̄o s̄è p̄ón ma ū. Ma ze kū kína kū Isarailano k̄āa p̄īo. ¹⁹ Abire gbera d̄o, dí mé à mana mà z̄ò blene, n baasii? Lákū ma z̄ò blè n den̄e nà, len mà blenne l̄e.

²⁰ Abusalomu pì Aitofeline: À lé dawá. Bón óni kee? ²¹ Akū Aitofeli w̄èa à pì: Ñ gé ñ w̄ute kū n de no yìgisaride kū à ní tó la òtèn be gwan̄o, de Isarailano le ò d̄s̄ ní pínki kū n tò n de ye n k̄airo, gb̄ē kū ò kú k̄unwon̄o gb̄āna ni kara. ²² Akū ò bizakuta d̄ò Abusalomune kp̄é musu, akū à ḡē à w̄ute kū a de no p̄ino gwe Isarailano pínki w̄āra. ²³ Ḡoro biren̄o lé kū Aitofeli d̄i dar̄ma de lán gb̄ē kū à yā

gbèka Ludaa yā bàme. Len Aitofeli lédamma de le Daudane kù Abusalomuo ń pínki.

17

Usai ɔ̀ndɔ̀kena Abusalomune

¹ Aitofeli pì Abusalomune: Tó makūme, mani zìkarinɔ̀ sé gbēnɔ̀n dúbu kuri awεεpla mà péte Daudai kúnwo gwāaniala. ² Mani létea gɔ̀rɔ̀ kù à kpàsa a ɔ̀ bùsa, mani a fu. A gbēnɔ̀ ni bàa lé ń pínki, mani a de ado, ³ mani sunne kù gbē pìnɔ̀ ń pínki. Gbē kù nten wete ñ de ganan gbē pìnɔ̀ suna ũ ń pínki. Tó à gà, gbē kparanɔ̀ ni gɔ̀ aafia ń pínki. ⁴ Yā pìi kè Abusalomune nna kù Isaraila gbē zɔ̀kɔ̀nɔ̀ ń pínki. ⁵ Akù Abusalomu pì: Ò Aki gbē Usai sísi dɔ̀ ò ma lákù ani o nà se. ⁶ Kù Usai kà, Abusalomu pìne: Lákù Aitofeli ò nà n dí. Ò ke lákù à ò nà n yá? Ke òsun ke lero. N è deramεε? ⁷ Usai wèa à pì: Lé kù Aitofeli dàáwa gbāra manaro. ⁸ N n de dɔ̀ kù a gbēnɔ̀. Zìkari mananɔ̀me ń ũ, ò pāsì lán músu nérande kù ò a néno siaa bàme. N de bi zìkariime, ani we à i gu dokɔ̀nɔ̀ kù a gbēnɔ̀oro. ⁹ Gu kù à kun tera, anigɔ̀ utena gbèwεεε gūn ke gukea. Tó à sù à lète ó gbēnɔ̀a káaku sɔ̀, gbē kù à a baaru mà ni pì, ò zìi blè Abusalomu zìkarinɔ̀ame. ¹⁰ Bee gɔ̀sa gbāna kù à wórɔ̀gɔ̀ vī lán músuu bànɔ̀ swè ni kēngume, zaakù Isarailanɔ̀ dɔ̀ ń pínki kù n de bi zìkari maname, akūsɔ̀ gɔ̀sa gbānanɔ̀n kú káao. ¹¹ Abire yāi lédamma yā kù má vīn dí. N Isarailanɔ̀ kakaranyī ń pínki zaa Dani ari gena Beseba, ògɔ̀ dasi lán ísirale bùsu'atē bà, ñ doñne are zìlan. ¹² Oni a le gu kù à kun pínki, óni létea lán plí dī kóte zītea nà. Àpì kù gbē kù ò kú káonɔ̀

ń pínki, ń gbēke ni boro. ¹³ Tó à sù à gè wēte ke gūmme s̄s, Isaraila gbē s̄inda pínki ni bà sé à géo gwe, oni wēte pì kátebono gáte ò táo guvuten. Bee a gbè kaso ke, oni e gwe doro. ¹⁴ Akū Abusalomu kū Isarailano pì ń pínki: Usai lédamma mana de Aitofeli póla. Dikiri mé à zèò à Aitofeli lédamma mana pìi gboro, de à le à Abusalomu ásarú ke yái.

¹⁵ Akū Usai ò sa'ori Zadokine kū sa'ori Abiatao à pì: Aitofeli lé dà Abusalomua kū Isaraila gbē z̄ók̄ōno à pì à ke lán dí bà, akū ma lé dàmma ma pì ò ke lán dí bà. ¹⁶ À gbēno z̄i likalika ò gé ò o Daudane àsun i swabikūkiaro, à bikū likalika, de òsun àpii kū gbē kū ò kú k̄āaono dúgu z̄oro yái. ¹⁷ Yonatā kū Aimazao kú Enlogeli, zaakū oni f̄s ò bo gupuraa Yurusalemuro. Akū nokpare z̄ikeri ke ḡe à ónne ò gé baaruu p̄i kpá k̄ina Daudane. ¹⁸ Akūs̄s̄ kefenna ke ń é, akū à ḡe à ò Abusalomune. Gbēnon pla p̄ino dà z̄én ḡōno, ò ḡe gbēke bea Bahurimu. Lògo kú onn gwe, akū ò ḡēn. ¹⁹ Akū bede pì n̄ano lògo pì né kpàale à p̄oblewe f̄àtea, gbēke a yā d̄oro. ²⁰ Kū Abusalomu gbēno sù n̄ogbē pì bea ò pì: Aimaza kū Yonatāo kú m̄amee? À w̄emma à pì: Ò bikū swa'onea. Ò ń w̄ete, odi ń ero, akū ò èra ò tà Yurusalemu. ²¹ Kū ò tà, akū gbēnon pla p̄ino b̄ote lògo p̄i ḡūn, ò ḡe ò p̄i k̄ina Daudane: Ñ bikū swaa likalika, zaakū Aitofeli n̄ kpakpa kū yā v̄aniome. ²² Dauda dà z̄én kū gbē kū ò kú k̄āaono ń pínki, ò bikū Yodaa. Kū gu d̄ò, ń gbēke dí ḡoro, ò bikū ń pínki. ²³ Kū Aitofeli è òdi z̄i ke a lédamma yāaro, à f̄ute à ḡarii ȳi a zaakine à tà a be w̄eten. À a be p̄ono n̄ak̄ōa, akū à a z̄ida lòko à ḡà, akū ò a v̄i a de

mirawεεn.

²⁴ Dauda gèε Manaimu, akū Abusalomu bikū Yodaa kū Isarailanɔ́ ń pínki. ²⁵ Abusalomu Amasa dìte zìkarinɔ́ gbě zõkõ ũ Yoabu gēne ũ. Amasa bi Sumaila buri Yeta néme. A dan Naasa né Abigaili ũ, Yoabu da Zeruya dakūname. ²⁶ Isarailanɔ́ kū Abusalomuo bùraa kè Giliada busun.

²⁷ Kū Dauda kà Manaimu, Naasa né Sobi, Raba wēte kū à kú Amɔninɔ́ busun gbě sù kū Lodeba gbě Amieli né Makio kū Rogelimu kū à kú Giliada busun gbě Bazilaio. ²⁸ Ò sù kū wutebɔnɔ́ kū tanɔ́ kū oronɔ́ kū éseo kū nagāo kū wísitio kū póblewε kpatanaao kū bláo kū dò pónɔ́ ²⁹ kū zóo kū vífaaniio kū sã nòbɔɔo kū gásiio, ò kpà Daudaa kū gbě kū ò kú kãaonɔ́ ò ble, zaakū ò pi: Nà kū ímio gbě pìnɔ́ dè gbárannan, ò kpàsa.

18

Abusalomu ganaa

¹ Dauda gbě kū ò kú kãaonɔ́ kàkara, akū à gbě zõkõnɔ́ dìtedite gbēnɔ́n wàa sɔsɔronɔ́ne kū gbēnɔ́n basɔsɔronɔ́. ² Akū à a zìkarii pìnɔ́ kpàatete gã aakõ. À gã do nà Zeruya né Yoabune a ɔĩ, a do sã Yoabu dakūna Abisai ɔĩ, a do sã Gata gbě Itai ɔĩ. Akū kína pì a zìkarinɔ́ne: Makūme mani doáre are. ³ Akū gbēnɔ́ pì: Ñsun géro. Tó o sù o bàa lè, oni ó yã daro. Bee tó ó gbě kpadonɔ́ gàga, oni ó yã daro. Mòkɔ́n òteni n gwa de gbēnɔ́n dúbu kurinola. N kpanawái wēte gūn mé à mana. ⁴ Akū kína pìne: Lákú à kèáre mana nànn mani ke. Kína gèε à zè bīnile sare, akū zìkarinɔ́ bòte gã kū gãao gbēnɔ́n basɔsɔronɔ́ kū gbēnɔ́n wàa sɔsɔronɔ́. ⁵ Akū kína

yā dìte Yoabunε kũ Abisaio kũ Itaio à pì: À ke kefenna Abusalomunε busebuse ma yāi. Zìkarinɔ yā kũ kína dìte gbē zōkōnɔnε Abusalomu yā musu mà n pínki. ⁶ Zìkarinɔ bòte ò gèe lákpen, de ò zì ká kũ Isarailanɔ, akũ ò si kō té Eflaimu dākɔn. ⁷ Dauda zìkarinɔ zìi blè Isarailanɔa. Gbē kũ ò gàga zī bireanɔn dasi, gbēnɔn dúbu baromε. ⁸ Zìi pìi dà bùsuu pìla pínki, akũ zī birea sènte gbēnɔ blè dasi de fēnedala.

⁹ Kũ Abusalomu kpàkũ kũ Dauda gbēnɔ, à dina baragbāsɔ kpε. Akũ baragbāsɔ pìi gèe gbiri lí zōkō gānɔ gbáru, akũ a wakaa kpà līgān gíngin, akũ a sɔ pìi gè zéla, à gò lokona līgān gwe. ¹⁰ Kũ gbēke a è, à gèe à pì Yoabunε: Ma Abusalomu è lokona līgān. ¹¹ Akũ Yoabu pì gbē kũ à baaruu pìi kpàarene: Bóɔɔ? N a è yá? Bóyāin ndi a lé n deroo? De yā ma n gba andurufu kuri kũ zìka'asaa. ¹² Akũ gbē pìi wè Yoabua à pì: Bee tó ò andurufu wàa sɔɔro yò ò kà ma ɔn, mani fɔ mà ɔ pá kína né pìiario, zaakũ kína yā dìtenne kũ Abisaio kũ Itaio ó sã mà, à pì ò ke kefenna Abusalomunε busebuse. ¹³ Tó ma a dè, de ma ásarú kè ma zīdanemε. A ke utena kínanero, mòkōn sɔ ñni ze kũmaoro. ¹⁴ Yoabu pì: Mani n dā doro. Akũ à sári sōnte sè mèn aakɔ, à gèe à Abusalomu zòo a swèn gɔrɔ kũ à lokona līgān bēne. ¹⁵ Akũ Yoabu zìkapɔnɔseri gbēnɔn kurinɔ likai ò a dè.

¹⁶ Akũ Yoabu kuru pè à a zìkarinɔ dàdā, akũ ò kámma bò kũ petena Isarailanɔiio. ¹⁷ Ò Abusalomu gèe sè ò zù wèe zōkō gūn lákpen gwe, akũ ò gbèe kàkaraa, à gò gbèdidikōana zōkō ũ. Isarailanɔ sɔ ò

bàa lè, ní baadi tà a bea.

¹⁸ Gɔɔ kũ Abusalomu kun, à gbèe pète a zĩdane Kína guvuten, zaakũ à pì á nэг̃ɔgbē vīro, akũ á ye a tó garo. À a zĩda tó kpà gbè kũ à pète pìine, akũ òdig̃ɔ gwe sísi Abusalomu Dɔngupɔ ari kũ a gbārao.

Dauda Abusalomu ga baarumanaa

¹⁹ Zadɔki né Aimaza pì: Ñ tó mà bàa lé mà gé baaru kpá kínane, lákũ Dikiri yā nna kpāa nà à a bò a iberenɔ ɔĩ. ²⁰ Akũ Yoabu pìne: Ñni le ñ baaru kpá gbāraro, sé gɔɔ pānde zĩ. Gbāra pó dín ñni kpáro, kũ kína né gā yāi. ²¹ Akũ Yoabu pì Etiopia burine: Ñ gé ñ yā kũ n è o kínane. Akũ Etiopia buri pìi kùte Yoabune à fùte kũ bàao. ²² Zadɔki né Aimaza èra à pì Yoabune: Bee deramee, ñ tó mà bàa lé màg̃ɔ té Etiopia buri pìi kpe. Akũ Yoabu pìne: Né, bóyāi ñ ye ñ géé? Baaruu pìi nig̃ɔ àre vīnnero. ²³ Akũ Aimaza pì: Bee deramee, má ye mà géme. Akũ Yoabu pìne: Ñ gé! Akũ à bàa lè à gèe à bòte kũ swa sare zéó, à Etiopia buri pìi kè.

²⁴ Dauda vutena wēte bīnile gbà mèn plano dagura. Gudākpārii dīdi bīnia ari gānu pìi musu. Kũ à wé zù, à gbēke è à té kũ bàao. ²⁵ À lé zù kīnai à òne. Akũ kína pì: Lákũ à té ado nà, àten su kũ baaru nnaome. Kũ àten su, à kà kāni. ²⁶ Akũ gudākpārii pìi gbē pānde è dɔ, àten bàa lé. À lé zù zédākpārii à pì: Gbē pānde té a kpe dire kũ bàao, àten su dɔ. Akũ kína pì: Àten su kũ baaru nnaome dɔ se. ²⁷ Akũ gudākpārii pìi pì: Ma è gbē káaku bàasina de lán Zadɔki né Aimaza bàasinaa bà. Akũ kína pì: Gbē maname, baaru nnan àten suo. ²⁸ Aimaza lé zù kīnai à pì: Aafia kun! Akũ à kùte kínane à mīi pète

zāngurinɔn n̄ yeńyĩ, akū n̄ zā n yenyĩdenɔgu. N m̀wewε gbāra, ókɔnɔ n z̄ikari gbē z̄ɔkɔnɔ kū ó gbēnɔ ódi kánne p̄óke ũro. Ma d̄s̄ sà, tó Abusalomu kun gbāra, akū ókɔnɔ o gaga ó p̄ínki, abirekū mé ani kenne nna. ⁷ N̄ fute n̄ bo sà. N̄ gé n̄ n gbēnɔ n̄ese kpáteńne. Ma sinne kū Dikirio, tó ndi géro, n̄ gbēke ni i k̄unwo la gwāanialaro. Abirekū ni kenne vāni de yā vāni kū à n le zaa n kefenakegɔɔa ari suna gbārala. ⁸ Akū kína fute à ḡε à vute b̄inilea. Kū ò ò gbēnɔne kína vutena gānun, akū ò sù ò z̄ε a are n̄ p̄ínki.

Dauda gbεsena

Isarailanɔ bàa lè, baadi tà a bea. ⁹ Isaraila burinɔ té p̄ínki gbēnɔ ten lékpakɔana ke ò pi: Kína ó sí ó iberenɔa à ó bó Filisitininɔ ɔĩ, akū à bàa lè à bò ó bùsun Abusalomu yāi. ¹⁰ O Abusalomu kà kpatan, akū à gà z̄ilan. Bón áten dā kū kína gbεsenaao?

¹¹ Kína Dauda gbēnɔ z̄i sa'ori Zadokia kū sa'ori Abiatao à pi: Yā kū Isarailanɔ ten o p̄ínki ḡε ma s̄an zaa ma kúkia la. À yā dík̄ina gbeka Yuda gbē z̄ɔkɔnɔa à pi: Bóyāi a ḡɔ kpe kū ma gbεsenaao? ¹² Ma gbēnɔ, p̄ó dokɔnɔn̄n ó ũ, ó aru dokɔnɔme. À k̄ε dera a ḡi k̄ε kū ma gbεsenaao? ¹³ N̄ o Amasanε p̄ó dokɔnɔn̄n ó ũ, ó aru dokɔnɔme. Tó mádi tó à ḡs̄ ma z̄ikarinɔ gbē z̄ɔk̄ ũ Yoabu ḡεne ũ zaa gbāraro, Luda yā kemene p̄ās̄ip̄ās̄i. ¹⁴ A yā Yudanɔ sw̄εε blè, n̄ lé k̄ε dokɔnɔ, akū ò légbāzā k̄ene ò pi: N̄ su kū n gbēnɔ n̄ p̄ínki.

¹⁵ Kína ten su, à kà Yodai, akū Yudanɔ ḡεε daale zaa Giligala, de ò bikū k̄āao swa piia. ¹⁶ Gera né Sim̄ei, Biliaminu buri kū à kú Bahurimu w̄à à gé

da kína Daudale kú Yudanɔ. ¹⁷ Biliaminu burinɔn kú káao gbēnɔn wàa sɔɔro. Solu begwari Ziba gèe dɔ kú a nэгɔgbē gbēnɔn gēronɔ kú a zīkeri gbēnɔn baronɔ. Ò wà ò kà Yoda léa kína ā, ¹⁸ de ò le ò bikū kú kínabedenɔ, ò yā kú ani ke kínane nna ke yāi. Akū Gera né Simeɪ wùte kína are ari àgō gé bikū Yodaa. ¹⁹ À pìnɛ: Ma dikiri, òsun ma taari yā daro. Yā vāni kú makū n zòbleri ma kènne gɔɔ kú n bo Yurusalemu sún dɔnguro. Ma dikiri kína, òsungō yā pì kúna n swèe gūnlo. ²⁰ Makū n zòbleri, má dō kú ma durunna kè. Yusufu burinɔ té ñ pínki, makūme ma doñne are ma su danle gbāra ma dikiri kína. ²¹ Akū Zeruya né Abisai pì: Simeɪ kína kú Dikiri kàa kàmɛ. Adi ká ò a deroo? ²² Akū Dauda pì: Zeruya nénɔ, bón ó vī kōoo? Á ye à zé zōmɛne gbāran yá? Óni gbēke de Isarailanɔ būsun gbāraro, zaakū má dō gbāra kú makūme Isarailanɔ kína ũ. ²³ Akū kína pì Simeɪnɛ: Īni garo. Akū kína la dàne.

²⁴ Solu daikore Mefibose gèe da kínale. Zaa gɔɔ kú kína bò wēten ari gɔɔ kú à sù aafia, Mefibose dí a gbá pípiro, adi a yīkā zōzōro, adi a pónɔ pípiro. ²⁵ Kú à bò Yurusalemu à sù à dà kínale nà, akū kína a là à pì: Mefibose, À kè dera ñdi gé kúmaoroo? ²⁶ À wèa à pì: Ma dikiri kína, ma zīkeri mé à òndō kèmenɛ. Ma òne à gàari yīmenɛ ma zaakinɛ mà dia mà gé kúnwo, zaakū erɛen ma ũ. ²⁷ Ma dikiri kína, akū à gèe à makū n zòblerii yàka n kīnaa. Ma dikiri kína ñ de lán Luda malaika bàme. Ñ ke lākū à kènne mana nà. ²⁸ Ma dikiri kína, à de yā n ma de bedenɔ dède ñ pínki, akū n makū n zòbleri baka kākara kú n gbē kú òdi pò ble lelenɔ. Má zé vī mà kúte ke kenne doro. ²⁹ Akū kína pìnɛ: Yā kpaten ĩni o dɔɔ? Ma dìte mɔkɔn

kū Zibao, à zĩte kpaatekõneme. ³⁰ Akū Mefibose pì kínane: Ma dikiri kína, lákū n su be aafia nà, ò tó à sé pínki.

³¹ Giliada bùsu gbě Bazilai bò Rogelimu à gèe ze kínane ari Yoda bara dire. ³² Bazilai zĩ kù manamana à kà wè basiikõ. À kína yàrii kè goro kù à kú Manaimu, zaakū aruzekede zõkõme. ³³ Akū kína pìne: Ñ bikū kúmao, mani n gwa ma bea zaa Yurusalemu. ³⁴ Bazilai wèa à pì: Wè ùgba mé à gòmene andunia gūn kù mà tá kūnwo Yurusalemuu? ³⁵ Ma ka wè basiikõ kò. Má pò mana kù a vānio dõkõne dõ yá? Makū n zòbleri mani fõ mà pò kù ma blè ke í kù ma mì nna ma dõ yá? Mani gõgbě ke nõgbě lèsirinõ kòto ma dõ yá? Ma dikiri kína, ò tó mà aso lagonne. ³⁶ Makū n zòbleri óni Yoda bikū lèe, mà zenne kānikāni gwe. À kè dera ní ye ò fīna bomene lèe? ³⁷ Makū n zòbleri, ò tó mà era mà tá ma be wèten, de māsun ga ma de kù ma da mirao zāro yāi. Ñ ma né n zòbleri Kimamu gwa la. Ma dikiri kína, ò tó à bikū kūnwo. Ñ kene lákū à kenne mana nà. ³⁸ Akū kína pì: Kimamu ni bikū kúmao. Mani yá kù à kenne mana kene, yá kù n gbèkama sõ pínki mani kenne. ³⁹ Gbě sīnda pínki bikū Yodaa, akū kína bikū. Kína lé pè Bazilaia à sa mana òne, akū Bazilai èra à tà be.

⁴⁰ Kù kína bikū à gèe Giligala, Kimamu bikū kāao.

Yuda zìkarinõ ní pínki kù Isaraila zìkari kpadonõ kína bikū. ⁴¹ Akū Isaraila buri pínki sù ò kína lè ò pìne: Bóyāi ó gbě Yudanõ bikū kāáo kpāni, mōkōn kù n bedenõ kù n gbēnõ pínkii? ⁴² Akū Yudanõ wèmma ò pì: Kù kína de ó dane ù yāime. Bóyāi yā

bire kèáre ñiii? Ódi kína zàna blero, ódi a pòke sí ó pò ũro. ⁴³ Akū Isarailanɔ pì Yudanɔne: Zaakū ó buri leu kurime, ó ɔ kú kú kína Daudao de á pòla. Bóyāi a ó díte futaa? Ókɔnɔme o kína gbesena yā ò káakuroo? Ama Yudanɔ wena pásī de Isarailanɔ pòla.

20

Seba bona Dauda kpe

¹ Gaavude ke mé à kú gwe, a tón Seba, Bikiri né, Biliaminu burime. Akū à kuru pè à pi:

Ó baka kú kú Daudaoro,
ó bàka kú kú Yese néoro,
ákɔnɔ Isarailanɔ, á baadi tá a bea.

² Akū Isarailanɔ kè Daudaa ní pínki ò gèe ò nà Bikiri né Sebaa, ama Yudanɔ zè kú ní kínao bona zaa Yodai ari Yurusalemu. ³ Kú Dauda sù a bea Yurusalemu, à a nɔ yìgisaride gbēnɔn kuri kú à tò òten be gwanɔ sè à ní ká be ken ògɔ ní dākpā. Dauda ní gwá, ama adi wúte kúnwo doru. Ò ní káka kpén gyaanɔnɔ ũme ari ò gèe ò gágao.

⁴ Akū kína pì Amasanɔ: Ñ Yuda zìkarinɔ sísi ò kakaramai gɔɔ aakɔ dagura. Mɔkɔn sɔ, ñigɔ kú lame. ⁵ Amasa gèe à Yudanɔ sísi, ama à gli kè de gɔɔ kú kína ditenela. ⁶ Akū Dauda pì Abisainɔ: Bikiri né Seba ni wari dɔwá tera de wari kú Abusalomu dɔwála. Ñ ma gbēnɔ séte à pétei, de àsun sí wète bñiden à piti ó ɔiro yāi. ⁷ Akū Yoabu gbēnɔ kú kína dākpārinɔ kú zìkarinɔ ní pínki ò bòte Yurusalemu ò pète Bikiri né Sebai.

⁸ Gɔɔ kú ò kú gbè gbèntē kú à kú Gibiɔ sare, akū Amasa sù dañle. Yoabu zìka'uta dana, a fēne dona a pi. Kú à nà Amasai, à fēne pì wòto a plen ⁹ à pìne:

Ma gbě, ní aafia yá? Akū à Amasa kù a lékāsāa kù a ɔ plao lákū à ye à lé péaa bà. ¹⁰ Amasa dí fēne kù à kú Yoabu ɔn tàasi káro, akū Yoabu a z̄o a gberen, a nukāninɔ b̄ote à kàte z̄ite. Yoabu dí era à a plade z̄o doro, zaakū à gà kò. Akū Yoabu kù a dakūna Abisaio p̄ete Bikiri né Sebai.

¹¹ Yoabu ìbanɔ do ḡo zena Amasala à pì: Gbě kù à zè kù Yoabuo kù Daudao, à do Yoabui. ¹² Aru dana Amasa gèla zédan, akū z̄ikari kù òten sunɔ zè òten gwa ní pínki. Kù Yoabu ìbaa p̄ii è gbě kù òten su gwenɔ ní pínki ò zè òten gwa, akū à Amasa gèe gàte à gòo zén à dìte s̄en, akū à uta kùala. ¹³ Kù à gàte à gòo zén le, gbě s̄inda pínki bò à tè Yoabui, akū ò Bikiri né Seba gbèsè.

¹⁴ Seba lika Isaraila burinɔ bùsuui pínki ari Abeli Betemaka, akū Beri burinɔ sù ò kàkara ò t̄ei gwe. ¹⁵ Yoabunɔ sù ò likai zaa Abeli Betemaka. Ò bùsuu kàtekate w̄ete b̄ini sare, akū òten wete ò b̄ini p̄ii gboro. ¹⁶ Akū nɔgbě ɔnd̄ode ke lé zù zaa w̄ete gūn à pì: À s̄a kpá! À s̄a kpá! Ñ o Yoabune à su la, mà yā one. ¹⁷ Kù Yoabu nà nɔgbě p̄iii, akū à a là à pì: M̄ok̄omme Yoabu ū yá? À w̄ea à pì: Makūme! Akū à p̄ine: Ñ s̄a kpá makū n z̄òbleri yāi. À pì: Ma s̄a kpà. ¹⁸ Akū nɔgbě p̄ii p̄ii: Òdi pi yā, ñ yā gbeka Abelidenɔa, yā le à mì de. ¹⁹ Ó kun yākete sari Isaraila gbě nāanidenɔ ū, akū nten wete ñ Isaraila w̄ete tóde dí kakate yá? B̄oyāi ní ye ñ Dikiri w̄ete de? ²⁰ Yoabu w̄ea à pì: Gyam! Oi! Má ye mà á dedero. Má ye mà á w̄ete kakatero. ²¹ Lenlo! Gbě kù òdi p̄ine Bikiri né Seba, Eflaimu burinɔ bùsu s̄is̄ide gbě mé à f̄ute kína Daudai. À gbě m̄en do p̄ii kpáma, mani go

á wětela. Akū nɔgbē pìi pìnɛ: Ñ ma! Oni a mì zunnɛ zaa bñni musu.

²² Nɔgbē pìi gèɛ à a gbēnɔ lè kū a ɔndɔkeo, akū ò Bikiri né Seba mì zɔ̀ ò zù Yoabunɛ. Yoabu kuru pè, akū ò fàkɔ̀a, ò wětɛ pìi tò gwe. Baadi tà a bea, akū Yoabu pìi tà kína kīnaa Yurusalemu.

Dauda ibanɔ

²³ Yoabunɛ Isaraila zìkarinɔ pínki gbē zɔ̀kɔ̀ ũ. Yoyada né Benayamɛ dogarinɔ gbē zɔ̀kɔ̀ ũ.

²⁴ Adoniramunɛ zònɔ gbē zɔ̀kɔ̀ ũ. Ailudi né Yosafatamɛ baarukpari ũ. ²⁵ Sevamɛ takadakēri ũ. Zadɔ̀ki kū Abiataoomɛ sa'orikinɔ ũ. ²⁶ Yairi gbē Iramɛ Dauda kpàasi ũ.

21

Fīnabona Gibiɔ̀denɔnɛ

¹ Nà kun Dauda gɔ̀rɔ̀a, à g̀i kè ari wè aakɔ̀. Dauda Dikiri arɛ wètɛ, akū Dikiri pì: Solu yāimɛ. Gbēɔ̀yā wì a be musu, kū à Gibiɔ̀denɔ̀ dèdɛ yāi. ² Akū kína Gibiɔ̀denɔ̀ sisi à yā ò́nɛ. Gibiɔ̀denɔ̀n de Isarailanɔ̀ ũro, Amɔ̀ri buri kū ò g̀nɔ̀mɛ. Isarailanɔ̀ la dà́nɛ yā ò pì oni n̄ dèdɛro, akū Solu wètɛ à n̄ lakiti ke a aniakɛnaa Isarailanɔ̀nɛ kū Yudanɔ̀ yāi. ³ Akū Dauda Gibiɔ̀denɔ̀ là à pì: Bón á ye mà keáɛɛ? Deran mani kúte keáɛɛ, de à le à Dikiri gbēnɔ̀ sáabu kpáa? ⁴ Ò wèa ò pì: Ó zé vī ò andurufu ke wura gbɛka Solua ke a bedeanɔ̀ro, akūsɔ̀ ó zé vī ò Isaraila gbēke dɛro. Akū Dauda n̄ lá à pì: Áten pi deramɛɛ? Bón mani keáɛɛ? ⁵ Ò wèa ò pì: Gbē kū à ó dèdɛ à lé kpàkūsūwái à ó láka de à le à ó buri bo Isarailanɔ̀ gún yāi, ⁶ tó ò a buri gɔ̀gbē mèn supplanɔ̀ kpáwá, óni

ń loko lía Dikiri arɛ Gibea, kína Solu kũ Dikiri kàa pì be wētɛn. Akũ kína pì: Mani ń kpááwame. ⁷ Kína dí Yonatã né Mefibose, Solu daikore kpám̄maro, lé kũ ò kè Dikiria læle kũ Yonatão yãí. ⁸ À nэг̄ōgbē gbēnɔn pla kũ Aya nэн̄ōgbē Rizipa ì kũ Soluoo sè. ń tón dí: Am̄oni kũ Mefiboseo. À nэг̄ōgbē gbēnɔn sɔɔro kũ Solu nэн̄ōgbē Meraba ì kũ Mɛɔla gbē Bazilai né Adielionɔ sè dɔ. ⁹ À ń ná Gibiōdenɔne ń ɔí, akũ ò ń loko lía s̄s̄ii musu Dikiri arɛ. Gbēnɔn suppla pìnɔ gà læleɛmɛ, ò ń dɛdɛ pó dúfu kekegɔɔa.

¹⁰ Aya né Rizipa uta kasanɔ sè à kpàte a z̄idane gbèea gwe. Zaa pó dúfu kekegɔɔa ari legũ gèè à gèè pìnɔ gbē, àdigō gí bānɔne ò dir̄mma fānantē, àdigō gí s̄ente n̄bɔnɔne ò nańyĩ gwāani. ¹¹ Ò yã kũ Solu nɔ yìgisaride pii kèè ò Daudane, ¹² akũ à gèè à Solu kũ a né Yonatão wánɔ sète Yabesi Giliadadenɔ kia. À sù à lè ò ń gènɔ sète kpāni Betesã gānulea, gu kũ Filisitininɔ ń loko b̄ńia Solu dena Giliboa gbera. ¹³ Dauda tò ò ń gèwa pìnɔ sète ò tàò, ò kàkara kũ gbē kũ ò ń loko pìnɔ gèwanɔ, ¹⁴ akũ ò v̄ì Solu de Kisi miran Zela, Biliaminu burinɔ bùsun. Ò yã kũ kína òte kè pínki, akũ Luda adua kũ ò kè Isarailanɔ bùsu yã musu s̄i kũńwo.

Gbē gbānagbānanɔ dɛdɛnaa

¹⁵ Filisitininɔ èra ò z̄ii kà kũ Isarailanɔ dɔ. Dauda kũ a gbēnɔ gèè ò z̄ii kà kũńwo. Kũ Dauda gbāna làka, ¹⁶ akũ gbē gbānanɔ buri Isibi Benɔbu pì áni Dauda demɛ. A m̄ogotē sári t̄ikisi de kiloo aak̄ōla, à f̄nɛda dufu lokona. ¹⁷ Akũ Zeruya né Abisai kpài à

Filisitini pìi dè. Akū Dauda gbēnɔ la dànɛ ò pì: Īni gé kúoo zìlan doro, de ó Isarailanɔ fitila sún garo yāi.

¹⁸ Abire gbera òten zì ká kū Filisitininɔ Gobu, akū Usa gbē Sibekai gbē gbàna buri kū òdi pine Safa dè. ¹⁹ Zìi èra à fùtɛ kū Filisitininɔ Gobu dɔ, akū Bètilihamu gbē Yairi né Elana Gata gbē Gɔlaya dakūna Lami dè. Lami sári pá de lán bizatāri gòdo lí bàme. ²⁰ Kū òten zì ká kūńwo Gata dɔ, gbē tìkisi ke kú gwe, a ɔnenɔ kū a gbánenɔ mèn suddodome, à kè pínki baraasɔɔro donsari. Gbē gbànanɔ burime dɔ. ²¹ À kùsɛɛ bìri Isarailanɔa, akū Dauda v̄ni Simea né Yonatā a dè. ²² Gbēnɔn siikɔ pìnɔ bi Gata gbē gbànanɔ burinɔme. Dauda kū a gbēnɔ mé ò n̄ dedɛ.

22

Dauda Dikiri sáabukpana a zìblena yā musu (Zab 18)

¹ Kū Dikiri kína Dauda bò Solu kū a ibɛɛ kparanɔ ɔĩ, à lɛɛ dà kū Dikiri tóo ² à pì:

Dikirimɛ ma gbèsi kū ma zeki gbānao ũ,
ma surabariime.

³ Ma Ludame ma gbèsi ũ, madì nai.

Àkūme ma sēgbako ũ
ma surabari gbāna kū ma guleio,
ma uteki kū ma bokio,
àdi ma sí gbē pāsīnɔa.

⁴ Dikiri kà ò a sáabu kpá.

Madì a sísi, àdi ma bo ma ibɛɛnɔ ɔĩ.

⁵ Gó'ite vlè kūmao,
ísɔ kū àdi n̄ kakate teni ma ble.

⁶ Mira bànɔ lìkamai,

ga tankute kpàkpamene ma are.

⁷ Kū má kú warí gūn le, ma Dikiri sìsi,
ma wiki lè ma Ludaa,
akū à ma kòtoo mà zaa a bea,
ma wiki kà a kīnaa, à gè a sán.

⁸ Zĩte lùkaluka à yìgāyīgā,
kpino dègedege ari n zīnin.

Ò lùkaluka kū a pò fè yāi.

⁹ Túsukpe bò a yīn,
té kū àdi n kpata bò a lén,
a yòno ten té ke a are.

¹⁰ À musu wè à kipa,
legū sisi a gbá gbáru.

¹¹ Àten vura dina kerubu kpe,
àten yàa ke ĩala.

¹² À gusira dà a zīdala,
ludambe sira kù a kúkila.

¹³ Zaa a gakuri tékenaa gūn
legū ten pí pāsīpāsī.

¹⁴ Dikiri pàta zaa musu,
Luda Musude kòto do legūpūtāna ũ.

¹⁵ À kàa fà ma iberenɔa à n fākɔa,
à tò legū pīmma à pèrīma.

¹⁶ Kū Dikiri pàtāmma,
kū à pò bò a yīn,
ísira zĩte bò gupuraa,
andunia zīni gò katena pótompo.

¹⁷ À ɔ bò zaa musu à ma kū,
à ma bo swada gūn.

¹⁸ À ma si ma ibere gbāna ɔĩ

kū ma zānguri kū n gbāna demalanɔ.

19 Ò lètɛma ma sunyĩkɛgɔɔa,
ama Dikiri zè kūmao.

20 À ma bo à ma gba m̀̀poroki,
à ma sura bà kū à yemai yāi.

21 Dikiri yā k̀̀mɛnɛ ma ǹ̀sɛmana lén,
à fīna b̀̀mɛnɛ ma gbāsīsarike lén.

22 Zaakū má Luda yāditenanɔ kūna,
mádi yā vāni ke ma a Luda tònlo.

23 A dokayānɔ dīgɔ domɛnɛ arɛ pínki,
mádi kpɛ li yā kū à ditenɔnɛro.

24 Má kunna taari vī Dikirinɛro,
má a zīda kūna durunna sari.

25 Dikiri fīna b̀̀mɛnɛ ma ǹ̀sɛmana lén,
zaakū à è má kun gbāsī sari.

26 Náanideme n ũ náanidenɔnɛ,
taarisarideme n ũ taarisaridenɔnɛ.

27 N swáswa gbɛ swáswanɔnɛ,
ama ndi ibɛɛ kpá kū gbɛ d̀̀rɔsaridenɔ.

28 Ndi zīdabusarinɔ sura ba,
ndi zīdabirinɔ lago.

29 Dikiri, m̀̀kɔmmɛ ma fitila ũ,
Dikiri, ndi ma gusira lite gupura ũ.

30 Kū n gbānao mani fɔ mà kusi karaaa,
ma Luda gāi mani fɔ mà vī gbīla.

31 Luda díkīna sɔ a yākɛna papana,
Dikiri yā mamberu vīro, à swáswa,
à de s̀̀gbako ũ gbɛ kū ò nàinɔnɛ.

32 Dikiri baasiro, dín Luda ũu?
Ó Luda baasiro, dín gbèsi ũu?

33 Luda mé àdi ma gba gbāna,
àkū àdi zé poromene súsu.

34 Àdi tó ma gbá kái gō nna lán zō pó bà,
àdi tó màgō táa o guleino musu.

35 Àdi zìkanaa dadamene,
ari ma gāsā ni fō à mōgotē sá gá.

36 Ndi n zìblena sēgbako kpáma,
ndi nate ñ ma tó bo.

37 Ndi ma zé yāasa kūmene,
de ma gbá sún sataro.

38 Ma pete ma ibereno ma ñ dúgu zò,
mádi era mà suro, sé ma ge ma ñ dede.

39 Ma ñ wiwi dúgudugu, odi fō ò fùte doro,
ò lète ò gō katena ma gbá gēi.

40 N ma gba gbāna ma zìi kào,
n tò ma ibereno mì natemene.

41 N tò ma zāngurino kpe li,
akū ma a ibere pino kàkate.

42 Ò wiki lè, gbēke dí ñ sura baro,
ò lé zù Dikirii, adi werímaro.

43 Ma ñ ké nékuneku lán bùsutiti bà,
ma táa òmma lán zé gūn bokoto bà.

44 N ma bo ma gbē kū ò fùtemaino oĩ,
n ma ke burino mède ũ.

Buri kū má ñ dōrono di zò blemene,

45 buri zītano di kā natemene.

Tó ò ma yā mà, òdi mì natemene.

46 Ñ kā di ga,

òdi bo ñ kúki gbānanon kū lukanaao.

47 Dikiri kun! Arubarikademe ma gbèsi ũ!

Ò Luda ma gbèsi ma surabari tó bo!

48 Luda mé àdi mɔra káámamene,
àdi tó burinɔ̀ mì natemene,

49 àdi tó mà piti ma iberenɔ̀a.

N ma gba gbāna de ma zāngurinɔ̀la,
n ma bo gbē pāsīnɔ̀ ɔ̄ĩ.

50 Abire yāi mani n sáabu kpá burinɔ̀ té,
mani n tó kpá, Dikiri.

51 Dikiri dì zì zókò ble kína kũ á sèene,
àdi gbēke ke kína kũ á kàane,
makũ Dauda kũ ma burinɔ̀
ari gɔ̀rɔ̀ sīnda pínki.

23

Yā kpede kũ Dauda òo

1 Yā kpede kũ Dauda òon dí.

Yese né Dauda yān dí,
gbē kũ Luda a gbà gbāna yā'onaame.

Yakubu Luda a kà kína ũ,
àkūme Isarailanɔ̀ lèdari mana ũ.

2 Dikiri Nini yā dāmene,
a yā da ma lén.

3 Isarailanɔ̀ Luda yā ò,
Isarailanɔ̀ Gbèsi pìmene:
Tó gbē kí blè gbēnɔ̀a a zéa,
tó à kí blè vīnakena Ludane gūn,

4 àdigò de lán ifāntē bɔtena gupura bàme,
lán gudɔ̀na gukēkōanaa bà,
lán legū kũ àdi tó sè bute bà.

5 Ma bedenɔ̀n nna kũ Ludaoroo?
A bàka nigò kú kũmao ari gɔ̀rɔ̀ sīnda pínki.

À a yā gògò pínki, à sika vīro.

Ani bo kũ ma surabanaaoroo?

Ani p3 kũ má a ni vĩ kpáma pínkiroo?

⁶ Gbē pānɔn de lán lèe bàme,
òdi z̄s̄ ò zukūname, òdi kũ kyáuro.

⁷ Gbē kũ à ye à ɔ kea,
séto àḡs̄ ḡs̄kebo ke gò kũna,
àdi té naa gu kũ à kún.

Dauda ḡsa gbānanɔ

⁸ Dauda ḡsa gbānanɔ tón dí. Takemɔ gbē Yasɔbeamume z̄ikari tóde gbēnɔn aakɔnɔ gbē z̄s̄k̄s̄ ũ. Àkũ mé à sári sè gbēnɔn wàa siik̄nɔi à n̄ z̄s̄z̄s̄o n̄ pínki gɔrɔ dok̄nɔ z̄i. ⁹ Gbē bire gbera Dodai né Eieaza, Ahoa gbē kú z̄ikari gbēnɔn aak̄s̄ p̄nɔ té dɔ. À kú kũ Daudao gɔrɔ kũ Isarailanɔ kākara ò z̄i kà kũ Filisitininɔ zaa Pasadamimu. Isarailanɔ b̄oru kpe kpa, ¹⁰ àkũ mé à f̄ute à Filisitininɔ dède ari a ɔ wà à ḡs̄ f̄eneda pá kũna. Dikiri tò à z̄i blè manamana z̄i birea. Z̄ikari kparanɔ èra ò sù ò a lè, ama pónɔ porona gènɔa yāime. ¹¹ Gbē dí gbera Age né Sama gus̄is̄ide gbē kun. Kũ Filisitininɔ ḡaa kākara gu kũ blá bú kún, Isarailanɔ bàa lènn̄e, ¹² àkũ mé à zè à ḡi bú p̄i dagura. À bú p̄i s̄im̄ma à Filisitininɔ dède. Dikiri tò à z̄i blè manamana.

¹³ Pók̄ḡḡɔ wórɔḡɔde gbēnɔn baraakurinɔ té, gbēnɔn aak̄nɔ b̄ò ò ḡe Dauda k̄naa zaa Adulamu gbèw̄eɛn. Filisitininɔ ḡaa bùra katena Refaimu guvuten. ¹⁴ Gɔrɔ birea Dauda kú s̄entep̄ɔrɔtu, Filisitini gudāk̄p̄arinɔ s̄s̄ ò kú Betilihamu. ¹⁵ Dauda teni a be í ni de à p̄i: Dí mé ani gé à Betilihamu b̄inile l̄òḡ'í t̄ómen̄eɛ? ¹⁶ Wórɔḡɔde gbēnɔn aak̄s̄ p̄nɔ mé ò ḡe ò ḡe Filisitininɔ bùran, ò Betilihamu b̄inile l̄òḡ'í tò

ò sùo Daudanɛ. Akū adi we à m̀ìro, à k̀òtɛ Dikiri are sa'o'i ũ. ¹⁷ À p̀ì: Haba Dikiri, mani f̀õ mà í d̀íkū miro. Gb̃ē k̃ū ò g̀ì ñ w̃èndiino arumɛ. Adi we à m̀ìro. Ẁórɔ̀gɔ̀de gb̃ēñn aak̃õ p̀ìnɔ yākenaan gwe.

¹⁸ Zeruya né Abisai, Yoabu dakūna mé à ẁórɔ̀gɔ̀de gb̃ēñn baraakurino gb̃ē z̃õk̃õ ũ. Àkū mé à s̀ári s̀è gb̃ēñn w̃àa do kpé basɔ̀ronci à ñ d̀ede, akū à t̀ó b̀ò gb̃ēñn baraakurii p̀ìnɔ t́. ¹⁹ À t̀ó b̀ò de ẁórɔ̀gɔ̀de gb̃ēñn aak̃õ p̀ìnɔla, akū à g̃õ ñ gb̃ē z̃õk̃õ ũ, ama à kú ẁórɔ̀gɔ̀de t̀óde gb̃ēñn aak̃õ p̀ìnɔ t́ero. ²⁰ Yoyada né Benaya, Kabazeli gb̃ēme z̀ikari ẁórɔ̀gɔ̀de ũ. A yākenañn dasi. À M̃oabu z̀ikari t̀ódeñ d̀ede gb̃ēñn pla. À g̃ẽ w̃èe g̃ūn g̃ɔ̀ɔ̀ k̃ū legūgb̃e k̀òtɛ, à m̀úsuu d̀è. ²¹ À Misila g̃õsa gb̃āna k̃ū à s̀ári k̃ūnaa d̀è. À ñai k̃ū g̀òoo à a s̀ári s̀ia à a d̀èo. ²² Yoyada né Benaya mé à yā p̀ìnɔ k̀è, akū à t̀ó b̀ò ẁórɔ̀gɔ̀de gb̃ēñn baraakurii p̀ìnɔ t́. ²³ À t̀ó b̀ò de ẁórɔ̀gɔ̀de gb̃ēñn baraakurii p̀ìnɔla, ama à kú ẁórɔ̀gɔ̀ t̀óde gb̃ēñn aak̃õ p̀ìnɔ t́ero. Akū Dauda a d̀ite a d̃akp̃ariño gb̃ē z̃õk̃õ ũ.

²⁴ Gb̃ēñn baraakurii p̀ìnɔ t̀ón dí:

Yoabu dakūna Asaheli,

Dodo né Elana Betilihamu gb̃ē,

²⁵ Arodi gb̃ēño Sama k̃ū Elikao,

²⁶ Paliti gb̃ē Elezi,

Tekoa gb̃ē Ikési né Ira,

²⁷ Anato gb̃ē Abieza,

Usa gb̃ē M̃ebunai,

²⁸ Ahoa gb̃ē Salam̃o,

Netofa gb̃ē Marai,

²⁹ Netofa gb̃ē Baana né Elebu,

Gibea kũ à kú Biliaminu b̀usun gbẽ Ribai né Itai,

³⁰ Piratõ gbẽ Benaya,

Gaasi guvute gbẽ Idai,

³¹ Araba gbẽ Abialabõ,

Bahurimu gbẽ Azamave,

³² Salaboni gbẽ Eliabu,

Yasẽ néno,

³³ gusĩsĩde gbẽ Sama né Yonatã,

gusĩsĩde gbẽ Saraa né Ahiamu,

³⁴ Maaka gbẽ Asabai né Elifeleti,

Gilo gbẽ Aitofeli né Eliamu,

³⁵ Kaameli gbẽ Ezero,

Larubu buri Parai,

³⁶ Zoba gbẽ Natã né Igali,

Gada buri Bani,

³⁷ Amõni buri Zeleki,

Bero gbẽ Narai, Zeruya né Yoabu z̀ikapõõserii,

³⁸ Yeta gbẽno Ira kũ Garebuo

³⁹ kũ Iti buri Uriao.

Ñ pínki ò gbẽnon baraakuri awẽsupplame.

24

Dauda a z̀ikarinõ naronaa

¹ Dikiri era à põ fẽ Isarailanõ, akũ à Dauda dà à ɔ kà yã à pì: Ñ gé n Isarailanõ kũ Yudanõ naro.

² Akũ kína pì Yoabune kũ z̀ikari gbẽ zõkõ kũ ò kú kãaonõ à pì: À Isaraila burinõ b̀usu para sena zaa Dani ari à gé pé Besebaa, à z̀ikarinõ naro de mà le mà n dasi lé dõ. ³ Akũ Yoabu pì kınane: Ma dikiri kína, Dikiri n Luda n gbẽno karanne leu basõoro n wé siale, ama ma dikiri kína, À kè dera n ye n ke lee?

⁴ Bee kũ abireo kína yã Yoabu kũ z̀ikari gbẽ zõkõno

blè, akū ò bòtè kína kīnaa ò gèe Isarailanɔ narɔ. ⁵ Kū ò bikū Yodaa, akū ò bùraa kàtè Aroa sarɛ. Wētɛ pì kú guvutemmɛ. Akū ò kurè Gada bùsun ari Yaza. ⁶ Ò kurè Giliada bùsun ò gèe Kadɛsi, Iti bùsun ari Daniyani, akū ò gèe Sidɔ kpa. ⁷ Ò gèe Taya wētɛ bīniden kū Ivi wētɛnɔ kū Kanaa wētɛnɔ pínki, akū ò gèe Yudanɔ bùsu gènnɔmidɔki kpa ari Bɛsɛba. ⁸ Ò kurè bùsu pì gūn pínki. Mɔ kēndo kū gɔɔ baroo gbera ò èra ò sù Yurusalɛmu. ⁹ Akū Yoabu gbɛ kū à ñ naronɔ lé ò kīnanɛ. Isaraila gɔgbɛ kū ò fēnɛda dōnɔ gbēnɔn dúbu wàa siikɔ. Yudanɔ sɔ gbēnɔn dúbu wàa pla kpé basɔɔro.

¹⁰ Gbɛ pìnɔ naronaa gbera Dauda kú tómadɔyā gūn, akū à pì Dikirinɛ: Ma durunna kè yā pì kenaa gūn manamana. Dikiri, makū n zòbleri, ñ ma taari kēma sà, zaakū ma yōnkɔ yā kè. ¹¹ Ari Dauda gɔ gé fute kɔnkɔ, Dikiri yā didi annabi Gada, Dauda wégupu'eriia à pì: ¹² Ñ gé ñ o Daudanɛ ma pì, mani yā mèn aakɔ kátɛnɛ. À yā pìnɔ do gwa à sé, mani kenɛ. ¹³ Akū Gada gèe à Dauda lè à pìnɛ: Nà kana n bùsun wè suppla ke n iberɛnɔ pɛtɛnanyī ñ bàa léñnɛ mɔ aakɔ ke gagagyā gēna n bùsun gɔɔ aakɔ, a kpaten n sèe? Ñ laasun léa ñ gwa, mani gé mà o Luda kū à ma zīnɛ. ¹⁴ Akū Dauda pì Gadannɛ: Má kú warikɛna zɔkɔɔ gūn. Ma si ò létɛ ò da Dikiri ɔī, zaakū à wēnda vī manamana. Àsun tó mà létɛ mà da bisāsiri ɔīro. ¹⁵ Akū Dikiri tò gagagyā gè Isarailanɔgu zaa kɔnkɔ birea ari gɔɔ kū à zèo. Sena zaa Dani ari à gèe pé Bɛsɛbaa Isarailanɔ gàga gbēnɔn dúbu baaakɔ akuri. ¹⁶ Kū malaika ɔ bò à Yurusalɛmudenɔ kakatɛ, Dikiri a nèsɛɛ lītɛ yā pìi

musu, akū à pì malaika kū àteni n̄ kakate pìne: Ñ ze le! Ñ n̄ era sà. Yebusi buri Arauna pówegbēkin Dikiri malaikaa pì kún. ¹⁷ Goro kū Dauda malaika pì è àteni n̄ dede, à pì Dikirine: Makū mé ma durunna kè ma taari kè. Gbē pìno bi ma kpàsa sãno me, odi yãke kero. Ñ tó n̄ su makū kū ma de bedenã.

¹⁸ Zĩ birea Gada gèe à Dauda lè à pìne: Ñ gé Dikiri gbagbaki bo Yebusi buri Arauna pówegbēkia. ¹⁹ Akū Dauda gèe lákū Dikiri a yã ò Gadane nà. ²⁰ Kū Arauna wé zù, à è kína kū a gbēno ten su a kĩnaa, akū à gèe à kùtene à wùte a gbera ²¹ à pì: Ma dikiri kína, À kè dera nten su makū n zòbleri kĩnaa le? Dauda wèa à pì: Ma su mà n pówegbēki lúmma mà Dikiri gbagbaki bon, de gagagyã pì le à go gbēno yaĩ. ²² Akū Arauna pì Daudane: Ma dikiri kína, n̄ pó kū à kènne mana sé n̄ sa oo. Ñ zùno gwa sa'opo ũ. Ñ pówegbēgonõ kū gbãngonõ sète yàka ũ. ²³ Kína, ma n̄ gba pínki. Arauna era à pìne dõ: Dikiri n̄ Luda sí kúnwo. ²⁴ Akū kína pìne: Oi! Mani lúmma, mani a fĩna bonne. Mani sa o Dikiri ma Luda pã fĩnabonaa sariro. Akū à pówegbēki pì kū zùno lù andurufu bupla akuri. ²⁵ Akū à Dikiri gbagbaki bò gwe à sa'opo kū òdi ká tén à té kū òa kū kennakūkõ sa'oponõ. Dikiri sì kãao a bùsu yã musu, akū gagagyã pì zè.

Luda yá takada kú Bisá yáo
Portions of the Holy Bible in the Busa language of
Nigeria

copyright © 2005 SIM International

Language: Bisá (Busa)

Translation by: SIM

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-10-10

PDF generated using Haiola and XeLaTeX on 11 Nov 2022 from source files dated 9 Oct 2020

8631d380-7d17-5581-abf9-174814e8ccc3